

# *HO RUA LINTHO TSOHLE*

 Ke motlotlo feela ho fihla mona. Ke ananela lithapelo tsa lōna hoba le utloe ka kotsinyana e ntlhahetseng. Ho a bontša feela hobane Satane a ke ke a u nka hofihlela Molimo a itlhophile. 'Me ke a kholoa bongata ba lōna bo ipotsa kamoo e... se etsahetseng. Haesale ke ratiloe... Joalokaha le tseba ke... boithabiso ba ka, kapa seo ke iphomotsang ka sona, ke ho tšoasa lihlapi kapa ho theohela lebaleng ho ea thunya, kapa ho ea tsoma, kapa ntho e kang eo. Ke thabetse hoo. Hola ka tlameha ho bapala kolofo, e ka be e le kantle mane moo basali ba batlang ba tsotse. 'Me holane ea eba—'me holane ka ba sebapali sa bolo, le tseba kamoo ho ka beng ho le kateng, hoo. Empa ke—ke thabetse haele libaka tse kantle, tse kang ho tšoasa lihlapi, ho tsoma le lintho.

<sup>2</sup> 'Me haesale ke ratile se seng sa lithunya tseo tsa Weatherby Magnum. 'Me ke kholoa holane ka bua taba ka sona motho a ka be a ne a nthekele sona, empa ka itholela hobane e le chelete e ngata haholo ho bona ho e kenya mono, 'me ke tseba baromuo ba se nang lietsa maotong a bona. Ke ntano lumella motho ho lefella seo, ho ntša chelete e ngata hakaalo ho lefella sethunya? Ha se khale ha Moena Art Wilson a fa Billy morao mane moetso oa Winchester mashome a supileng, oa Roberts makholo-mashohlano-supra. Eaba Mongh. Weatherby o hlahisa pampiri hore a ka tšoara sethunya seo ho se fetola nakoana ka mono ho se etsa Weatherby Magnum, se bolokehile ka bophethehi feela. Ka hona Moena Rodney o kena kereke mona, Moena Rodney Armstrong a se romela a re se fetoleloe ho Weatherby Magnum. Atha hase a fetoloa ka tšoanelo. Ka hona eitseha ke thunya ka sona, ke Weath-... K'hampani ea Winchester e re sethunya sa bona se mamella khatello ea dipondo tse likete tse tšeletseng le makholo a tšeletseng a metso e robong. Le a tseba seo e ka bang sona.

<sup>3</sup> 'Me ke ne ke sa tsoa nka sethunya, Moena Wood a theohetse mono le 'na, 'me e batla e le inchi ho tloha leihlong la ka, joalo. 'Me khatello e qhomisitseng lipondo tse likete tse tšeletseng le makholo a robong sebaka sa lijarete tse mashome a mahlano, lopo ea sethunya ea oela koana moeling oa lijarete tse mashome a mahlano, boutu ea oela nqa ena, 'me sethunya sa qhaqholoha letsohong la ka feela. Khanare ea mollo ea lakomela bophahamo ba siling eane, e le phetho seo ke se tsebileng motsotso kapa e 'meli. 'Me, ha ke re pha, mali a ne a tsareletsa ka mona *tjena*, ka hopola hobane ke shoele, ka kokosa letsoho la ka *joalo* nakoana. 'Me Moena Wood... Ka leka ho sheba, feela ha ke a khona ho bona ka leihlo lena, hape ke sa utloe ho hang. Ka utloa eka hojane ke tsamaea sebakeng. 'Me ka bona Moena Wood a tobile tekele

ho bona moo tholoana e otlileng, 'me ka leka ho hula maikutlo a hae. Eaba o fihla mono 'me ra nyoloha. 'Me lesale la phatsa le ralletse leihlo. 'Me ea ka o mpatile ka hambega sefahlehong, moo e phatlotseng sefahleho sa ka. 'Me liphatsahali li totometsoe kaholingoana ho leihlo feela, tsa rala lebali la selikisi hantle holim'a lesapo la mahana le holim'a lesapo la lehata *mona*. Ke Ngaka Adair ea li hlomotseng.

<sup>4</sup> Matsatsi a 'maloa hamorao, ehlile, letsatsi le hhahlamang, Doc a fihla kokelong ka seqo. Ba nthomela ho sepheshelisi mabapi le leihlo la ka. A fumana lebali la lesale, katlasana ho pono feela, liphatsa tse ka bang mashome a mararo li liketse polokoeng ea leihlo koana. Li ke ke tsa ntšoa. Tsa tloha, tsa fosa pono 'me tsa rala selikisi ka mokhoa ona. A re, "Ke tseba ntho e le 'ngoe feela," a ngolla Ngaka Adair lengolo, ho re, "Morena ea molemo o tšoanetse a be a ne a lutse setulong le eena, ho sireletsa mohlanka oa Hae, ho seng joalo a ke ba a sa sala le ka hlooho." Sohle seo Moena Wood a ka beng a se fumane e ka ba ho tloha *mona* ho ea tlase, le a bona. Khatello e chechileng ka santhao! Ha ke tsebe kamoo e entseng. Empa boutuhali eo e boima ea sethuny sa moetsa oa mashome a supileng ea qhoma ea chechella motšeо koana, haeba le tseba moo Conservation Club e leng teng, motšeо koana serobeng sa khama. 'Me ha re a thola sekotoana se seng sa sethuny le ka mohla.

<sup>5</sup> Ka hona, e bontša se seng. Ke tšoere therò ka eona letsatsi le leng, ha Morena a ratile, ka ho re "Tšokoloho e lōkile, empa u mpe u e baballe tlase. Haeba e sa rereloa ho laela boima boo e bo kakatletseng, e tla phatloha nako le nako." Ke hantle. Ka hona se lekeng ho... E mpe e be ea mantlha. Um, hum. Empa hase ho soma tse ling... [Khaitseli o bua phuthehong—Mohl.] Joale shebang, le a bona. Ke... Oh, ehlile, le nahana hore lintho tse kang tseo li ka boleloa.

<sup>6</sup> Empa, kamoo ke tsebang, ha ho—ha ho letho... Hoba, litsebe tsa ka, le ka nahana, e sa ntse e lla mololi ha maeke ona o khutlelana. Lebaka leo ke sa fihlang mona hoseng hona. U a bua, 'me u e utloa e phatlohela morao le pele. Empa ba nkisitse sepeshelising, ha thoe, "Ebile moropa tsebe ha u a ruruha. 'Me hape le leihlo," ha thoe, "pono ea hau e tla itšoanelia le ea mehleng." Ha thoe—ha thoe, "E kene tlasa pono. E mpa e ralile lebali le potolohang polokoe ea leihlo, ea itsetela." Ha thoe, "Phatsa e tla lula e le teng kamehla."

<sup>7</sup> Ka re, "Ke li jere ho tloha ke le lilemo tse peli, ho tsoa ho e 'ngoe."

<sup>8</sup> Moena Roberson morao mane, ke mo letsilitse ka 'molella ka eona. Ho re, "U se ke oa e tsotella," ho re, "'na ke jere lipondo tse peli kapa tse tharo," a rialo. Ke lekhaba le tsoang ntoeng. "U ke ke oa utloa bohloko, esale ke jere tse ngata."

<sup>9</sup> 'Me hase khale mona ke hopola pono ea Morena. Na le sa nkhopola ke e phetha mona? Mosa oa Morena hoseng hoo, ha thoe, "Se tshabe leha e ka ba eng, hohle moo u eang teng, kapa eng, hoba Boteng bo sa sitoeng ba Jesu Kreste bo na le uena hohle moo u eang teng." Ka hona a ke ke a khona, Satane a ka sitoa ho mpolaea hofihlela Molimo o re "ho felile." Le a bona? A ka e leka, empa a ke ke a atleha ho e phethisa.

<sup>10</sup> Ka hona, ntho e makatsang, ke ne ke tla ea leha ho le joalo, ho kenela kōpano ea ka, etsoe ke bone ka leihlo lena la ka le letšeħali hantle, 'me ke tla ea kōpanong leha ho le joalo. 'Me eaba bao, moena ea neng a tla kena setšeng sa Maindia, a tlameha ho hlakola kōpano eo, kapa ho e fetisetsa pele, hofihlela ke khutletse Lebopong la Bophirimela le ho nyolohela Lebopong la Bophirimela. Ka hona re tla nka kōpano mono. 'Me mehleng ena, Moena Arganbright o ile a ntšoara, 'me hoba kōpano eo e fete, ke nyolohela Achorage, Alaska. Lebaka leo ke neng ke itšetlehile hakaale . . .

<sup>11</sup> Bongata ba lōna le hopola pono ea ka, teng ke thuntse bere e makhisa, bere e makhisa ea maoto a robong, ('me kereke e nkhopola ke e phetha mona), le karibou. Ke ile ka fuoa e 'ngoe. Hopolang e teiping mona, ke bone bereħali ea tonana e sootho. E ka ba Kodiak 'me e ka be e sa sebetsa tlase mono Canada, hoba ha li eo mono, le a bona. Empa e ka bang kae, e tla etsahala. E tla etsahala, ke HO RIALO MORENA. E tla etsahala. Le a bona?

<sup>12</sup> 'Me joale ke le leboha ka ho nthapella. Ke tsebile bongata ba lōna bo tla be bo rapela ha le utloa hore ke hlahetsoe ke kotsi. 'Me seħlotšoana se le seng feela se . . . Morali oa ka motšeо mane, Rebekah, o ngoletse Khaitseli Dauch ea kenang kereke mona, lengolo, ho 'molella ka eona. 'Me a letsetsa Meda masiu a 'maloa hamorao, ho re, "Ha ke tsebe haeba e thusitse kapa che, empa seħlopha sa rōna mona se ile sa phutheha." Moreri oa Methodise le—le Moena Brown, ba bang ba leloko le bao bohle ba phutheha, ba nthapella bosiu bohle. Ho re, "Ha ke tsebe haeba Molimo a utloile kapa che, empa, re tsebile Moena Branham a rapeletse ba bangata hakana, ra hopola ho mo rapella." Ke oo mofuta A o utloang, le a bona. Ke hantle, mofuta oo o joalo!

<sup>13</sup> Moena Crase, e mong oa baena mona, Satane o sa tsoa mo sala morao, o ile a thula k'holbete, oh, ea seħa ntho ea hae feela ea . . . ka botlalo. Ha ke bone kamoo a tsoileng a ntse a phela. 'Me eare a sa robetse kantle mane kokelong o boletse moena e monyenyan a kene a tsoa New Albany, a bitsoa Medcalf, 'me a re, "Moena Crase, ha ke—ha ke—ha ke na tokelo ea ho tla u rapella, empa," ho re, "Morena o e behile pelōng ea ka feela, ka hona nke ke ka thusa letho." 'Me a tsoa feela a khumama, a etsa thapeloana a ntoo tsoa. Molimo oa folisa Moena Crase hantle mono. Le a bona? Mohla, le a bona, ke neo ea pholiso 'Meleng oa Kreste, le a bona, setho se seng ho se seng.

<sup>14</sup> U se nahane kahobane u le setho sa tloaelo feela; seo, u setho hakaalo ka motho mang o sele. Oo ke monoana oa ka hakaalo ka sephaka sena ha e le sephaka sa ka, kapa tsebe ena e le tsebe ea ka. Le a bona? Ke setho sa 'mele feela. 'Me bohle re . . . Ha setho se seng se utloa bohloko, litho tsohle li utloa bohloko 'moho. Ke bonngoe, bonngoe bo bokoang boo! Joale ke . . .

<sup>15</sup> Ka morao ho moo, joale, ke nkile likōpano tse ling hape 'me mono ke siets'e 'na le tabernakele nako ea bosiu feela, ha Morena a ratile. 'Me, ha Molimo a ratile, hoseng ha Sontaha se tlang sena ke batla ho bua ka *Mohlala Oa Moporofeta*, 'me e ntoo ba, tabernakeleng.

<sup>16</sup> Hosane bosiu, kapa Sontaha bosiu, ke holimō mona Gospel Tabernacle, e mong oa baena ba rōna, Moena Ruddell. Ke batla ho bua ka sehlooho, *Ho Bulela Setimi*, ha Moerna a ratile.

<sup>17</sup> 'Me Labobeli le latelang, re tlameha ho ea Wisconsin, 'moho le seboka sa tikoloho sa Full Gospel Business Men. 'Me mono ke qete masiu a mararo. Mono ke ho . . . Billy, lebitso la motse oo ke mang? Amohetsoe . . . [Moena Billy Paul Branham o re, "Green Lake."—Mohl.] Green Lake, Wisconsin. ["Labone."] Neneng? ["Labone, Labohlano, le Moqebelo; la lesshome-supā ho isa ho la lesshome-robong."] Labone, Labohlano, le Moqebelo; la lesshome-supā, lesshome-robeli, le lesshome-robong, mane Green Lake, Wisconsin, seboka sa tikoloho.

<sup>18</sup> 'Me hape Sontaha, oa la mashome a mabeli, ke Chicago odotoriamong ea Sekolo se Phahameng, re ne re le odotoriamong eona eo khetlo la ho qetela. Na u hopola lebitso leo? [Moena Billy Paul o re, "Stephen Mather."—Mohl.] Odotoriamo ea Sekolo se Phahameng sa Stephen Mather, Sontaha thapama.

<sup>19</sup> E ntoo ba Mantaha ke koana nthong . . . Ke lebala lebitso la tulo eo Morena a mpontšitseng seboka mohlang oo mabapi le Setlamo sa Bareri ba Chicago, ho teana le 'na ho qoqa ka lihlooho, le a tseba. Ka re, "'Me Morena a mpontša tulong eo.'" Ke kōpano ea ho lumelisa Moena Joseph Boze, eena ea tlang ho fihla mona ka sefofane hosane ho mpona, 'me o tla tšoareloa moketjana oa tumeliso ka Mantaha.

<sup>20</sup> Re ntoo khutlela lapeng hantle re tsamaea, hoba e tla be e le nako ea ho etela Southern Pines, Carolina Boroa, kapa Carolina Leboea. Le ho theohela Columbus, Carolina Boroa. 'Ne ntoo ba Cow Palace Lebopong la Bophirima. E ntoo ba holimō ho Grass City, le ho tsoella ho kena Spokane, ho tsoella ho kena Canada, e ntoo ba Alaska. Ka hona le re rapelle, re hlile re hloka lithapelo tsa lōna.

<sup>21</sup> 'Me re rutoa Lengolong hore lintho tsohle li sebelisana molemo 'moho ho ba ratang Molimo. 'Me kea lumela, ho tloha mohla sena, le ka ho bona botšepehi ba batho le joalo . . . Motha o itse, "Ebe e ka etsahala joang, ebe Molimo o ka lumella eng?" Nka be ke bolailoe tseleng ke tsoela koo, ntho e 'ngoe itseng, O—

O ne a batla ho koekoetla se seng. Hopolang, Mangolo a ke ke a hloleha, "Lintho tsohle li sebelisana molemo 'moho ho ba ratang Molimo." 'Me, haeba ke tseba pelō ea ka, ke a Mo rata. Ke—ke Mo rata ka pelō eohle ea ka. 'Me e re atametsa 'moho hanyenyane ho feta.

<sup>22</sup> 'Me, ho nahana joale, hore mang le mang ea e utloetseng, ha a utloisia ho ea ka'ng ha ke sa ntse ke setse ka hlooho le mahetla, le a bona, le ho lula hara ho qhoma hoo hohle. Seo, haufi hakana le 'na, ho phatloha ho ka etsang lipondo tse likete tse peli hantle sefahlehong sa hau. Le a bona, ho lekane ho u qhaqholla feela, le a bona, ho e fiela feela. Haeba e phatlotse sethunya seo sa setala se boima 'me oa phatlollela lopo eo kantle moeling oa lijarete tse makholo a mahlano, 'me—'me thupa, le tlameha ho bona sethunya feela. E ka re ha se sethunya, ho thonakiloe likotoana feela.

<sup>23</sup> 'Me hape, kathoko le moo, ha ho khahlamelo ea letho. Ho bokoe Molimo o phelang! Ho lekaneng feela ho ntiehisa ho nyolohela mono hofihlela ke utloile polelo e tsoang ho Eddie e re ha ke a tlameha ho tla nakong eo. "Mohau o makatsang, mololi o monate, o pholositse na ea soto!" 'Me e a re tsebisa, ho ananela Molimo o nang le rōna. Molimo o na le rōna, 'me re leboha hakakang!

<sup>24</sup> Joale, ke itse ke hopotse ho theoha hoseng hona, eaba moena ea theko e thata mona hoba ke khutle...Ke itse ho Khaitseli Wood kajeno, ke a kholoa Moena Neville...Billy o ntetselitse a re, "Mamela molaetsa ha u khona." 'Me ke lumela sekotoana seo sa tšepe se tsoile 'me sa kena tlasa leihlo la ka mono, se hlile se nkhulisa ka falese, empa se tsoile joale. Ba se hlatsoitse se tsoile. 'Me ha ho le joalo a re...Eaba ke hopola ho theoha bosium bona, 'me mohlomong moena eo ea theko e thata ea rerang joalo, ke a tseba ho joang ha u tšoere tšebeletso e le 'ngoe e khōlō 'me o ntano cha lentsoe, le a tseba, 'me—'me 'metso o cha o le bohloko. Eaba ke hopola ho theoha, 'me ka tšoara Mangolo a 'maloa ho a bala. Ka nahana, "Bosiu ba selallo."

Ke batla ho ja selallo kamehla.

<sup>25</sup> Ke na le metsoalle e 'maloa, e teng mona nqa e 'ngoe. Ha ke bone hantle haholo, kamoo le utloisisang. Ke sa na le Belladonna leihlong leo e sarolohile, ho batla ho rothofetse. 'Me ba teng mona, metsoalle le ba leloko la moena oa ka ea lokileng ea theko e thata, F. F. Bosworth, ea leng Khanyeng. Ka hona Morena a hlohonolofatse batho bao, re sa tsoa ba rapella phaposing e ka motšeо.

<sup>26</sup> Joale, le se lebale, Laboraro bosiu ke kōpano ea rōna ea thapelo ea hara veke. 'Me ha ke nahana, Moena Jackson, ea hae e Labone bosiu. 'Me Moena Junior holimo mona o ho...Kapa, Moena Ruddell ke Laboraro bosiu. 'Me tabernakele ea Utica ke Laboraro. [Moena Neville o re, "Ke Labone bosiu."—Mohl.] Ka

Labone bosiu. Le ho khutlela mona Sontaha hoseng tšebeletsong ea phutheho.

<sup>27</sup> 'Me hape joale, 'me Sontaha bosiu ke tlameha ho phutheha le Moena Ruddell 'moho. Ke ne ke e reretse Laboraro bosiu, empa veke e hlahlamang, feela nke ke ka khona, ka tlameha ho e fetisetsa Sontaha bosiu. Empa joale lōna batho ba mona tabernakeleng, le lule mona tabernakeleng, le a bona, hoba bosiung boo ke tla nyolohela ho Moena Brother Ruddell ho bua feela, ha se tšebeletso ea pholiso. 'Me, empa le hopole, lulang temeng ea lōna, hantle mona tabernakeleng. Ena ke nqalo ea ea lōna, le a bona. 'Me re tla shebella nako e monate. 'Me bohle le nthapelle ha re ntse re tsamaea joalo.

<sup>28</sup> Ho tšepa Molimo o tla kōpana le rōna bosiung bona joale pele ho selallo. 'Me joale ke nahana... Na ke phetho seo re se tšoereng, litsebiso, tseo re li tsebang? [Moena Neville o re, "E."—Mohl.] Joale, ho betla tsela... ["Lepato, hosane thapama."] Eng, moena? ["Lepato, hosane thapama, ka hora ea bobeli."] Lepato. ["Mane Edmonton. J. T. mme oa hae."] Oh, e. Lepato la... e mong oa baena ba rōna ba baevangeli ho tsoa tabernakeleng ena mona o feela... Be, ke e mong oa rōna mona. O oa tsoa o a aloosa o a rera, Moena J. T. Parnell. 'Ményana oa hae ea theko e thata o hlokahetse bosiu bo bong, mothoana, ea kobameng, 'mè ea pulufetseng. E tla ba Edmonton, Kentucky. Tšebeletso ea lepato e hosane. Ke a tseba bongata ba lōna le ipotsitse, na le ka mo isetsa lipalesa, empa re ke ke ra khona. Mokhoa oa kereke ho isa khare mono o mong feela, ba tlameha ho lets'a 'me raposo oa e isa. 'Me e tla lokela ho tsoa hosane, e bang e fihla mono kapa che, lipalesa, ho batla ho le thata. Empa re hlile re batla ho arola kutloelobohloko, moena, le Moena Parnell ka ho laheheloa ke 'mè oa hae, etsoe, ke sa tsoa feta moo haufinyane. 'Me ke a kholoa Khaitseli Spencer le ba bangata mona ba arola kutloelobohloko, le bona, ba tsoa feta meriting le mahlonoleng.

<sup>29</sup> Joale ha re inamiseng lihlooho tsa rōna nakoana feela, ka pel'a Sefahleho sa Oona, bakeng sa thapelo. Joale ke batla le nthapelle. 'Me ho batla ho le boima mona bosiung bona, ho leka ho bona, ka leseli lena le fahlang. 'Me—'me leihlo la ka le itoketse, empa ba le kentse belladonna ho le sarolla. Le tseba seo e leng sona. 'Me ho bile joalo matsatsi a ka bang tšeleta joale, le a bona, 'me o itse e ka qeta veke kapa matsatsi a leshome. Ka hona le nthapelle. 'Me khutlelano ea maekrofonu ona khahlano le marako, le nthapelle. 'Me na nka bona letsoho la lōna, 'me Molimo, ha le e na le kōpo phahamaisang letsoho la lōna feela. Molimo, araba thapelo, re sa phutheha ka mahlonoko re inama joale.

<sup>30</sup> Ntata rōna ea Maholimōng, ke Uena u khethileng hoba re phuthehe 'moho. Thato ea Molimo ke ha re phutheha 'moho re sa bona Letsatsi le atamela, le hona khafetsa, Morena, ho ikhulela

haufi le Uena le haufi le e mong, tlamong ea bolekane, Mali a Jesu a tšolotsoeng a etsa khonahalo ena.

<sup>31</sup> Re motlotlo haholo bosiung bona, Morena. Ha ke—ke—ke eso be motlotlo hakana ho—ho ba mona, Morena. Ke, ke U leboha haholo. Ha ke thole mantsoe ho a qhaneha ho hlalosa teboho ho fuoa pono le kutlo, le ho ema hara ba phelang mona lefatšeng, ho tsoellisa Evangeli. Re tlala kananelo haholo, Morena, ha re bona bohaufi boo feela... Holim'a banna ba kutloisiso ea tonana ba ingoaea hlooho feela ba re, "E be e ne e ka etsahala joang? Ke letsoho la Molimo le inotši!" Ka hona ka boikokobetso ke inamisa hlooho ea ka, Morena, ho bona mohlolo o etselitsoeng 'na, o entsoe haufi le moo mohlanka oa Hau a neng a eme. Ke motlotlo haholo. 'Me joale, Ntate, ke boela ke U khakolela bophelo ba ka bocha, ka mora ho tsamaea tlase mono. Bophelong motho a ke ke a tsamaea lintšing tsa lefu ho feta lekhatheng leo, 'me a phele. Ke lebohela haholo.

<sup>32</sup> 'Me joale ke rapella batho bana bohle ba phahamisitseng matsoho a bona bosiung bona, e mong le e mong o na le qelo. 'Me bongata bo na le teboho, e batla e le bohle, Morena, lipelōng tsa bona, ka seo U ba etselitseng sona le bona.

<sup>33</sup> Joale re tlie bosiung bona ho phuthehela lebaka le ikhethang haholo, lona ke lena, ho ja seo re se bitsang "selallo," kapa, "Sophoro ea Morena." Ho *lalla* ke "ho qoqa, kapa ho rerisana." 'Me ke seo re se etsang joale, Morena, ho rerisana le Morena oa rōna, ho qoqa, ho bua, re emetse Eèna ka karabelo ea Hae.

<sup>34</sup> 'Me joale, Ntate, re U rapela ho boela u qoqa le rōna bosiung bona ka Lentsoe le ngoliloeng. Le ho re neha se seng pelōng tsa rōna, thakhisa leeto la rōna—la rōna—la rōna, Morena, le ho fa sebete se secha. Le ho sitsa molisa oa rōna, Morena, moena rōna ea thekothata, mohlanka oa Hau, le mohatsa'e le balelapa; le batikone le literaseti, le motho mang ea tlang kerekeng. Oho Molimo, re hulele haufi le Uena. Ho be joalo, joalokaha seroki se buile, "Ho bokoe tlamo e bofang lipelō tsa rōna ka lerato la Bokreste. Setsoalle sa mehopolo e le meng se tšoana le sa holimō." Aba sena, Morena. Hlohonolofatsa barapeli lefatše bophara. 'Me joale, Ntate, re ngoatthele Bophobe ba Bophelo re sa U emetse. Ka Lebitso la Jesu Kreste, Ngoana oa Hau ea ratehang, re a e kōpa. Amen.

<sup>35</sup> Joale, batho ba bangata ba rata ho tšoaea mantsoe moo moreri a ka balang. 'Me ke tšoere... Thapama ha ke tsoile le Moena le Khaitseli Wood... E le ha re theohile ho bona Moena Gobel Roberson oa rōna, 'me re kene, phaposing ea hae ea litšupiso. Ra ntso khutla, 'me ka nahana... Khaitseli Wood a ntse a phetha molaetsa o khabane oo molisa oa rōna a neng a u tšoere hoseng hona. 'Me ke tsoatsoile ke hopola mothoana eo, e ka ba 'metso oa hae o bohloko, le oa ka bo, empa ka—ka hopola re ka arolelana sena 'moho, ha ho ka etsoa, haeba a nkōpile ho

bua. 'Me mona ke lahletse lintlha tse 'maloa tseo ke batlang ho bua ka tsona.

<sup>36</sup> Pele, ha re phetleng ho Bakorinthe ba Bobeli 6:7 ho isa ho 10. Bakorinthe ba Pele, khaolo ea 6, temana ea 7 le ea 10, 'moho. Hape Genese 14:18 ho isa ho 19. Le ho rala ho tsoa mono, ha Morena a ratile, a con-... kapa therò ho tsoa palong. 'Me joale ke tla bala ho oa Pele... kapa ho tsoa ho Bakorinthe ba Bobeli, pele, Bakorinthe ba Bobeli 6:7 ho isa ho 10.

*Ka lentsoe la 'neta, ka matla a Molimo, re ithusa ka lihlomo tsa ho lôka tse tšoaroang ka letsoho le letona le ka le letšehali,*

*Ka hlompho...hlomphollo, le hara liketselletso le botumo botle: joaloka hoja re le bathetsi, athe re ba 'neta;*

*joaloka hoja re le ba sa tsebjoeng,...re a tsebjoa; joaloka hoja re a shoa, 'me, bonang, athe re a phela; joaloka hoja re a lauoa, empa ha re bolaue;*

*joaloka hoja re hlomohile, athe re thabile le mehla; le joaloka hoja re a fumaneha, athe re ruisa ba bangata; le joaloka hoja ha re na letho, athe re ruile ntho tsohle.*

Genese 14:18 le 19.

*Melkisedeke morena oa Saleme a tlisa bohobe le veine: e ne e le eena moprista oa ea holimolimo...*

*A mo hlohonolofatsa Abrahama, a re, Ho hlohonolofatsoe Abrahama ke Molimo o holimolimo, mong'a maholimo le lefatše:*

<sup>37</sup> 'Me ha nka reella therò, ke rata ho bua ka seholoho, e leng... Ho Rua Lintho Tsohle. Joalokaha ho Bakorinthe mona, re... Le itse re—re mafutsana, feela re ruile lintho tsohle. Ho Rua Lintho Tsohle. Joale, ke rata seo. Joale ho Genese re bala ka Abrahama ea köpanang le Monna e moholo enoa ea bitsoang Melkisedeke, E ne e le Mong'a Leholumō le lefatše 'moho. Ka hona, E ne e le Mong'a lintho tsohle, Mong'a Leholumō le lefatše, eo, ke oa lintho tsohle.

<sup>38</sup> Joale, re tseba pale ea Abrahama le se hlahileng. O ne a bilelitsoe e—e temeng ea tšebetso. A bitsitsoe naheng ea habo, naheng ea Bakalde, le motseng oa Ure, a hlotse mono le ntatae le batho ba habo. 'Me ke tlase liphuleng tsa Shineare, ekaba e ne e le naha ea nala le e nonneng. 'Me Abrahama, ha re utloisia, e ne e se motho ea ikhethileng mahlong a lefatše. 'Me ka mantsoe a mang, e se khosi, kapa morenana, kapa moholo. E ne e le motho feela. 'Me a nyetsé morali oa ntatae, e leng Sara, mohlomong a mo nyetsé e sa le mosetsana. 'Me Molimo o mo bilelitse a le mashome a supileng a metso e mehlano a lilemo, bophelong ba tšebetso, ho kenyeletoea le molekane oa hae.

<sup>39</sup> 'Me hantle mona re ka qala. Ke lumela ha Molimo o biletsoa monna tšebetsong, haeba e le monna ea nyetseng a e na le

molekane, O mo bitsa le molekane oa hae, hobane ba babeli ba bang. 'Me ka hona, hohle, hamorao re fumana mohlomong Molimo o ka be o bolaile Sara mohla a belaetseng molaetsa oa Lengeloi, lilemo tse mashome a mabeli hamorao, mohla ba lutseng tlasa eike letsatsing leo, empa eitseha a tseha ha Lengeloi le 'molella, kapa ho bolella Abrahama, hore e tla ba 'mè, eaba Sara o itsehela a re, "Nka khona joang, ke tsofetse?" Lilemo tse mashome a robong, monna oa hae a le lekholo la lilemo. Ea hae... e se e le lilemo popelo ea hae e omeletse, le 'mele oa hae o se o ichoeletse. Ho ea ka'ng ha a ka boela a thaba le monna oa hae hape? 'Me a itsehela.

<sup>40</sup> 'Me Lengeloi, le neileng tente mokokotlo oa Lona, la re, "Sara o tsehile ke'ng?"

<sup>41</sup> 'Me o e latotse. Joale, ke ho bolella Molimo sefahlehong sa Oona hoba O "phoso." Le a bona? 'Me e ka be e tlositse bophelo ba hae, empa Molimo ha o a khona ho tlosa Sara, kaha e ne e le karolo ea Abrahama. Le a bona? 'Me o ne a kentsoe le eena selekaneng, eaba o tlameha ho tsamaea le eena. Ka hona O sitiloe ho tlosa Abrahama... kapa ho tlosa Sara, a sa nke karolo ea Abrahama, hoba ba babeli ba bang.

<sup>42</sup> Papiso e ntle ea rôna kajeno, ba se nang tokelo, ba loketsoeng ke lefu ha re etsa sebe, empa Molimo o ke ke oa re bolaea, hobane O ka... re karolo ea Kreste. Le a bona? Ke mohau oa rôna oo, hobane re bang le Kreste. Na ha se mohopolo o motle oo, bonngoe le Kreste? Ka baka leo, libe tsa rôna, ha re li etsa, re loketse ho phaka re ipolela tsona, ho re "li phoso," hoba Molimo o ka tlosa bophelo ba rôna. Empa Mali a re buella, 'me Molimo o ke ke oa parola Mali ao. Le a bona? O ke ke oa khona feela, hoba tsepiso e re O ke ke oa khona. Ka hona ha O ka ke oa roba tsepiso ea Oona ka Sebele. Le a bona? Ebile Molimo o Iketsa, ka mokhoa oa eona, oa ikoahela. Le a bona, ha O ka ke oa roba selekane sa Oona. 'Me O E tsepisitse ka Mali ao, ea lumelang o na le Bophelo Bosafeleng, 'me ha O ka ke oa roba tsepiso eo.

<sup>43</sup> Ka hona re fumana Abrahama, kutlong, a falla lehaeng la habo, ho falla naheng ea habo, a ikarohanya le sohle, maemo a hae ohle a lefatše, maruo, ho ea naheng esele, ho jaka. Papiso ea Kereke. Re koptjoa ho tela tsohle tse lefatšeng lena, ho sala Kreste morao.

<sup>44</sup> Joale, re fihlela Abrahama a latetse, selemo ka morao ho selemo. 'Me a nka kabelo 'moho, e leng ntatae, 'me a shoa hang. A ntoo nka motsoala'e, e ne e le Lota, 'me Lota a ikarohanya ka ho pheha khang, a theoha ahella Sodoma, koana e ntse e le karolo ea Abrahama. Lefatše leo le tsohle tse lefatšeng Molimo o li file, Abrahama, ea eba mojalefa oa tsona. Molimo o itse, "Sheba bochabela, bophirima, leboea, le boroa, 'me tsohle ke tsa hau le peō ea hau e latelang. Tsohle ke tsa hau!"

<sup>45</sup> Joale, ka tsatsi le leng Abrahama a hla a thatafalloa, athe Lota eena a iketlile, a lukela sebeng. Ho bonolo hakakang 'me sebe se shebeha se nyakallisa hakakang, 'me se shebeha se se na kotsi hakakang. Joale, haeba Lota a re, "Ha ke mpa ke lumela feela! Ke lumela ho Molimo, hobaneng nke ke ka theohela mona Sodoma, 'me—'me ho tla itokela. Ke molumeli." Empa ho ne ho sa loka.

<sup>46</sup> Le a bona, Molimo, mohla O neng o bitsa Abrahama, O 'mitsitse ho ikarohanya le sohle. "Me ke seo re tlamehang ho se etsa. Molimo o re biletsha ho ikarohanya le sebe ka botlalo, "Tsoang ho eona, le se nke kabelo le sona!" Tšabang, le ho tšoanang le bobe. Karohano, ho timeletsoa ka botlalo ho sona! Sirohela hole le sona. U se ke oa hata setšeng sa sona, ho sa tsotelehe kamoo—kamoo e... se shebehang se le monate.

<sup>47</sup> Löna batho, mona le ka nahana joale, ke ena, "Moena Branham, ka—ka linako tse ling ke lekoia ho utsoa, kapa ka linako tse ling ke lekoia ho tsuba." Kapa ka linako tse ling basali ba nahana, "Ke lekoia ho apara se sa batho ba lefatše, le a tseba, liaparo tse hananang le boitšaro le lintho. Ke a lekoia," maleiti a macha. Joale, le re seo se a leka, le reng ka mona moo u tlamehang ho beha khato e 'ngoe le e 'ngoe leihlo, le a bona, bosebeletsing. Ke ntho e fetang ka boholo hakakang mona, 'me ba tla mpatlha ho arabela ho feta. Hobane, le tlameha ho arabela meeaa ea löna, empa röna re tlameha ho arabela e mong le e mong eo re buang le eena. Le a bona? Ka hona Satane ha a phetse feela... Moo u ka reng, uena: "Na ha se mosana o motle oo? Na ke phoso ho apara, empa na ha o motle? O ka ntekana hantle feela." Athé ho 'na... Joale, seo, u a tseba hore se phoso. Empa ho moreri, "U tšoanelia ho etela kōpano ena mona, ehlile ke eona feela ntho. Ba re e khölö haholo, phuthe-..." 'Me koana u tlameha ho ema le ho utloa Molimo o re "e-ea," le a bona. "Oh, na u ka ea ka mona 'me oa bonana le motho enoa mona? Hona ho *tjena-le-tjena*." 'Me u tlameha ho ela hloko, hlokomela. Le a bona? Oh, e masejana. 'Me joale re tlameha ho beha lintho tseo leihlo.

<sup>48</sup> Joale, Abrahama a tlameha ho sheba, hape. Empa eena, sebakeng sa ho theoha le ho kena Sodoma le Lota, aikhethoa 'me a nyoloha a kena lehoatateng, ho khetha tsela ea bakhethoa bammaloa le banyatsuoa ba Morena. Eka khona e be boitšaro ba röna boo. Ho khetha tsela ea batho ba Molimo leha e le thata kapa e le bonolo, e-ea leha ho le joalo. Ikemisetse ho ea nako efe, joale, hohle moo A ka u biletang teng.

<sup>49</sup> Joale, hoba sena se fihle, eaba mono—mono ho fihla khosi e hlaselang morabenyanaa oa batho holimō mono, a haola le phula a hapa lihlotšoana tsohle, mebusonyana kantle, 'me a hapa, a kena Sodoma a hapa khosi ea Sodoma le Gomora, a hapella le Lota (motsoala'e Abrahama), mohatsa'e, barali ba hae, bana ba hae, bao bohle, le thepa ea bona bohle, tsohle tseo ba li ruileng, Ho tsoa hantle le ho fiela, a hloekisa naaha ha a feta. Oh, ntho

e tšabehang hakakang, moputso oa sebe ke lefu! Lota elelloa, ntle le pelaelo, ha a tsamaea mono mohlomong a tlanngoe ka—ka thapo kapa lehlaahlela molaleng, e le lekhoba; bana ba hae, banana ba tla rusulloa; le mohatsa'e, le sohle, 'me a ka shoa nako efe. O lesitse ho utloa taelo e le 'ngoe, mohlomong a kena 'musong o mong nqa e 'ngoe ho fetoha lekhoba matsatsi ohle a ho phela ha hae.

<sup>50</sup> Empa Abrahama, hoba a fumane Lota a hupuoe, e ne e le karolo ea lefa la Abrahama. 'Me Abrahama a ka tšoha a itse, "Molimo, U itse ha nka U utloa ka tsamaea mona, lefatšeng lena, U tla 'neha sena. Ke lefa la ka. 'Me Lota ke karolo ea sena, 'me ke mo sala morao." Eaba o thibella, kapa a phutha bahlanka ba hae 'moho, a ba hlomella. 'Me a nka bahlanka ba hae, a phalla hofihlela a fumane khosi enoa le mebusonyana ena eohle. Shebang e ne e le lebotoho le leholo ha kae mohlang oo! Empa tlasa bolaoli ba Molimo, Mogenerale oa Sehlooho, a itlhopholla, a ba oela sehloho a hlabaka likhosi, a busetsa Lota le mebusonyana eohle, ho ba khutlisetsa ho bona, lehaeng la bona hape.

<sup>51</sup> Ke setšoantšo se se kakang sa Kreste ka ho Abrahama mono, a phalletse hoba sera se hape tsohle, 'me Kreste o fihlile a re busetsa.

<sup>52</sup> Joale re sibolotse paleng e khōlō ea Abrahama, tseleng e khutlang, ho khutla ka morao ho tlholo, o kopane le Mong'a Maholimo le lefatše, Melkisedeke, e leng Khosi ea Jerusalema, Khosi ea Saleme, e beng e le Jerusalema, e leng Khosi ea Khotso, e leng Khosi ea ho Loka. A se na ntate, A se na 'mè, ha ho mohla A qalileng 'me ha ho mohla A tla ba le qetello, e ne e se letho haese Eamatlaohle. 'Me O kopane le eena tseleng e khutlelang hae, a tsoa fenetha khosi. O kopane le Mong'a lona, Ea neng A ruile lintho tsohle o kopane le eena tseleng e khutlang. Ntho e khanyang hakakang! Joale Abrahama . . .

<sup>53</sup> Ke rata sena. Abrahama e ne e le mojalefa oa tsohle, ka pallo, a ka tseka sohle se naheng, esita le lefatše bolona. Abrahama o na fuoe tšepiso. Joale, ha re utloisisa Abrahama e ne e le mofutsana ea fetisang naheng eohle, kaha a phetse kantle lehoatateng, a phela le Molimo ka khotso. 'Me Lota, ea ruileng, a phela motseng a hlongoa mogofonoro oa motse; a lutse khorong, e ne le moahloli, a ahllola motse, a atetsoe ke maruo ohle le lintho. Empa Abrahama a le lehoatateng, 'me . . . koana e le monna oa mofumanehi ho fetisa lefatšeng, athe o ipoletse a ruile tsohle. Amen! Ke seo ke se ratang.

<sup>54</sup> Oh, bosiung bona, e ka ba ha re a rua lithepa tsa lefatše, feela re ruile lintho tsohle. Kereke, Boeona, e ruile lintho tsohle. Leha e futsanehile, e ruile 'me lintho tsohle ke tsa eona. Ke rata seo. O . . . Rōna—rōna re joalo. Lilemong tse fetileng re ne re bina sefela sa khale, "Ntate oa Ka o ruile matlo le mafatše, Letlotlo

la lefatše le letsohong la Hae! Lirubi le litaemané, le silifera le gauta, liroto tsa Hae li tletse, matlotlo a Hae ha a boleloe.” ’Me ke a röna, hobane re ngoana oa Khosi. Amen. Kamehla ngoana ke mojalefa, re a tseba. Ho lokile.

<sup>55</sup> Abrahama a ka li tseka, leha a futsanehile, likhomo tsa hae li le lephako; Lota a fumane setša se setle. Metsi a hae a haella. Matsatsi a chesang, ’me balisa ba kene khathatsong, ea ka tsohle li tsamaela Abrahama ka phoso, athe ntho eohle ke ea hae.

<sup>56</sup> ’Me, kajeno, molumeli oa sebele ke molelekua hara batho, o bitsoa “lehlanya, mohalaleli mothethehi,” kapa lebitso la mofuta le tlakang, lehlanya la borapeli, athe koana ke mojalefa oa Maholimō ohle le lefatše. “Ho lehlohonolo ba bonolo, ba tla ja lefa la lefatše.” Oh, banna! Le bua ka ho thesemelotsoa kae-kae kantle kapa motlotloaneng, chelete e batla e sa lekana ho lefa rente ea hau, koana u e ruile eohle. Amen. Ho tlameha ho sebetsa le ho feheloa le ho fufulelloa didolara tse ’maloa, ho etsa malebaleba . . . ho phela ka botšepehi, ho phuthela maoto a bana ba hau ka lieta, le ho fepa melongoana ea bona e lapileng, athe koana u e ruile, u mojalefa oa sohle se leng teng mona. “Ba bonolo ba tla ja lefa la lefatše.” Ba le ruile. Oh, banna, ke rata seo! Mong’ a lefatše! Ke eng? Molumeli. Molumeli o qhoaetsoe lebitso la tlotsiso, thaetlelediti e hlaotsoeng, ke hantle, ka Jesu Kreste, ho re “E tla ba mojalefa oa bokahohle bona bohle.” Ke hantle. “Ba bonolo ba tla ja lefa la lefatše.”

<sup>57</sup> Abrahama o ne—o ne, a ka rua lefatše leo, hobane . . . le se leng holim’ a lona. Molimo o mo neile sona. ’Me Lota e ne e le karolo ea lefatše leo. Ka hona Abraham a ruile tokelo ea lona. A ka—a ka le bitsa kapa a le tseka. O itse, “Joale, Molimo, U nketselitse tsepiso, hore sohle se lefatšeng lena le se ho lona ke sa ka, ’Me U ense tsepiso. Joale mohaeso o nkiloe, le ling tsohle tsa hae li sheshennoe.”

<sup>58</sup> Ka mantsoe a mang, ha e ka sebelisoa kajeno, nka re, Kereke e ka rialo, “Morena Molimo, enoa ke moena oa ka, o robetsese mona, o teiloe ke mofetše, o teiloe ke lefuba, o ts’oeroe ke *hore-le-hore*. Ke laetsa tsepiso, ke leruo la ka. Uena, U mpoleletse joalo!” Amen! Ke moo. Ha ho le joalo, ha ho le joalo o ka sala sera seo morao, diabolosi eo, le ho se fenetha joalokaha Abrahama a fenethile likhosí a busa lefa la hae. Amen. Ke rata seo. E lebisitsoe ho molumeli.

<sup>59</sup> Koana leha Abrahama a filoe tokelo ea tsepiso, ’me tsepiso e le ea hae, a tšoanelá ho loana ho e rua. Amen. Ke moo. Molumeli kajeno, leha re le majalefa a lintho tsohle, koana re majalefa a lehlohonolo le leng le le leng la moea, lehlohonolo le leng le le leng ka nama, lehlohonolo le leng le le leng leo Bibebe e le tsepisang, koana u tšoanelá ho loana inchi e ’ngoe le e ’ngoe ea eona. Molimo o e hlophisitse joalo. Haesale ho lutse joalo. U tlameha ho loanelá ho rua seo u se tsebang e le sa hau. U

tlameha ho loana ho se fumana. 'Me le hona joale re tlameha ho e sebetsa joalo.

<sup>60</sup> U re, "Moena Branham, ke hloka pholiso."

<sup>61</sup> Tšepiso ke ea hau. Empa, ho e rua le ka mohla, u ke ke oa e rua habobebe, ke tla u bolella seo. U tla lokela ho ea e hlotha Satane. Satane o u hlothile monate 'meleng, ke tōkelo ea hau ho ea ho—ho Satane ho re, "E busetse! E tħise koano! Ke tla ka Lebitso la Morena, Mong'a Maholimō le lefatše, 'me ke mojalefa oa Hae. E busetse! U nkile ngoana ka, u mo hlekemantse le moshanyana ea phoso. U nkile moshanyana oa ka oa mo hlekemanya le ngoanana ea phoso. Ke a ba tseka! Ke hantle. Ke tseka bana ba ka, ke tseka moena oa ka, ke tseka khaitseli ea ka. E, Satane, u ba tlositse tlung ea Molimo, ho ba ngokela kantle mane, empa ke ba sala morao. Ke a ba tseka."

"Be, u tseba joang?"

<sup>62</sup> "Ke mojalefa oa lintho tsohle. Amen. Ke li neiloe. Ke mojalefa, nka tseka sohle seo Molimo a ntšepisitseng sona." Amen. Ke moo. "Ke sa ka." Ebe u se fumana joang, ka ntho eo u e entseng? Che, monghali. Ke neo eo Molimo o re neileng eona e sa sebeletsoa, 'me ke ea rōna, re e ruile. Satane a ka sitoa ho e ts'oara ha u ea ho eena ka—ka bolaoli ba Lengolo ba Lentsoe, ka tumelo, ho re, "Ke ea ka! E behe fatše." Amen. Khanya! Ke rata seo. "Satane, e behe fatše. U nkamohile eona. E khutlise, hobane ke u kata tlhokomeliso. Mona ke tħoere tlhokomeliso e ngotsoeng Lentsoeng hantle, 'Maholimō le lefatše li tla feta, haele tlhokomeliso ena lekhale.' Ka hona ke tla ka tlhokomeliso ena, ho u kata eona, hore Jesu Kreste o itse sohle seo le se kōpang Ntate ka Lebitso la Hae O tla 'nea sona. Ha nka re ho thaba ena, 'koqoha,' 'me ke sa belaele pelōng ea ka, ke mpa ke lumela hobane seo ke se boletseng se tla etsahala, nka fumana seo ke se boletseng. Se behe fatše!" Seo se a mo qalisa. U se ke oa mo qalisa, mo mathise. "E behe fatše, hobane ke tħile ka bolaoli ba Mangolo. 'Na ke molumeli.' Le a e tħoara na? E, monghali. E, monghali.

<sup>63</sup> O entse'ng pele, Abrahama, ho ka phethisa sena? A tlameha ho tsetleha tumelo ea hae motheong oa lejoe le tiileng la Lentsoe la Molimo la tšepiso. Shebang, a tħoere feela seħlotħoana sa basebeletsi, e ka ba tosene. 'Me banna ba mono e ka ba likete tse 'maloa, ba hlometse. Athie banna ba hae e ne e se masole, e ne e le basebeletsi, boramakħomo, boramanku, balisa; ba tħoere lithipa tsa khale tse mafome ba li thonakile nqa e 'ngoe, 'me li rapaletse holimo ho... kantle mono, 'me li netsoe ke lipula tse 'maloa, li le mafome. Empa Abrahama a sa sheba thipa e mafome, kapa le thebe ho hang. A tsetleħile tumelo ea hae Lentsoeng la Molimo. Ke moo. Ke eona ntho e sebetsang. Ke eona.

"U tla ba loantša joang ha u fiħla mono?"

<sup>64</sup> “Ha e batle ’na. ’Na ke hloka ho tšetleha tumelo ea ka ho seo Molimo o se boletseng. Ke ling tsa, ke sala ling tsa ka morao.” Amen. Joale, ha bakuli ba ka bona seo, boloetse bo felile hantle lekhatheng leo hantle. Le a bona? Ehlile bo.

<sup>65</sup> Ha moetsalibe a ka bona hobane ha u a tšoanela ho etsa sebe! Batho ba bangata, ba etsa sebe hobane ba tšoanetse ho etsa sebe. Ke tšobotsi e haulang ha u re u “tlameha ho etsa sebe.” Empa ha u itemoha u sa tlameha ho etsa sebe hape! Batho ba teng ba emang feela ba rohakana ba u tseha sefahlehong, le—le ho u bitsolla “leoatla” le sohle se sele, ke baetsalibe ba ka boomo. Le a bona, ha ba salloa ke tšepo ea letho. Empa monna eo ea sa phetseng ho etsa lethoana, ha ba batle ho e etsa. O—o a utsoa, ha a batle. ‘Me o bua leshano, ha a batle. O—o etsa lintho tseo a—a sa batleng ho li etsa, ha a ipatle e le moetsalibe. Litšepo li teng bakeng sa hae ha u ka mo lumella ho bona seo ‘Nete e leng sona. Le a bona? Ho nyolohela tšepisong ea Molimo le ho tšetleha tumelo ea hau holim’ a seo, le ho tsoela kantle mono u tjamela sera. Se ke ke sa khona ho e fupara hape, ke phetho, hobane ke ea hau.

<sup>66</sup> Joale, ha re shebang thaka lena joale. Mona Abrahamo o itse, “Ke mojalefa. Ntho ena ke ea ka, sohle lefatšeng lena ke sa ka. Hobane Molimo . . . ha ke eso se fumane le joale.” Empa o ne a se ts’oere, e ne e le sa hae, le hona.

<sup>67</sup> Joale re majalefa a lintho tsohle. Na ho joalo? Re majalefa a lintho tsohle. Bibele e sa tsoa bolela mona. Re ruile lintho tsohle, ntho e ’ngoe le e ’ngoe. Ha eso be ea rona le joale, empa ke ea rōna. Amen. Oh, khanya! Ha ke a rua noko ea lefatše, empa lintho tsohle ke tsa ka, leha ho le joalo. Ehlile. Ke ea hau eohle, ke ea batho, Kereke, balumeli, Monyaluoaa Kreste o ruile thojana ea eona eohle. Rashia e a e loanela, United States e loanela *sane*, le ho loanela *sena* le *sena* ka mane, ’me ba re bitsa “mahlanya.” Lula u thotse feela, ke ea hau, leha ho le joalo. Amen. Tsohle ho ba mojalefa oa eona, leha ho le joalo, ka hona ba ka pheha khang ba phatlolana. Ke ea rōna. Ke rōna ba le fumanang. Ha ba eso e nahane, empa re joalo, leha ho le joalo. Ho ba joalo, le ha ho le joalo!

<sup>68</sup> Ho no ka nahana mang hoba motsofe eo oa khale oa mofutsana holimo mono, likhomo tseo tsa khale tse masapo, holim’ a leralla, o ne a ruile eohle? Palestina eohle e ne e le ea hae. E, monghali. Eitseha a fihla nqalang ea makhaolakhang, Molimo oa ipaka o na le eena. A nka banna bao ba tlalang seatla a tsoela koo ’me a hlabaka e mong le e mong oa bona, a khutlisa lefa la hae. Amen. Ke rata seo. Hobaneng? A tšetleha tumelo ea hae holima tšepiso ea Lefika la Molimo. Ho hlokoaa seo. Ha a haha motheo o mong, ho ea ingolisa le mokhatlo kapa ho iphimanela ntho e kang ena. A tšetleha tumelo ea hae Tšepisong eo! Amen. Ke eona, holima Tšepiso eo, ’me a hoanta a thakhoha! Sabole e mafome kapa sabole e seng mafome, ha e a etsa phapang ea letho ho eena, o ne a tšetlehile tumelo ea hae holima Tšepiso.

<sup>69</sup> 'Me ha u tla rapelloa, ha u batla pholoso, ha u batla pholiso ea Khalalelo, e ka bang eng, ha u le molumeli, u mojalefa oa tsepiso e 'ngoe le e 'ngoe. Ka hona tsetleha tumelo ea hau tsepisong 'me u hoante, borella Satane, "E khutlise! E khutlise! Ke ea ka." U se mo lumelle ho u thetsa. Ema hantle mono holima moeli, o tla e khutlisa. Molimo itse o tla e etsa, ka hona o tlameha ho e etsa. Ke bolaoli ba hau boo. Ke hantle, mojalefa oa lintho tsohle!

<sup>70</sup> O ile a lula holima motheo oo, Lentsoe la tsepiso, 'me a rua mojalefa. E ne e le mojalefa, o e tsebile ke hona. Ho lokile, monghali, ka mora ho netefalatsoa tsepiso, a kena botsoalleng le Motsepisi (ke rata seo) hoba Molimo o etse tsepiso. 'Me eaba, le a bona, Abrahama o ne a eso fetisoe tekong pele, ka hona a... ea mofuta oo. Ka hona o tsebile ntho eohle e le ea hae, 'me e ne e le tsepiso, koana a eso tlamehe ho loantša lebotho le ka mohla. A sa tsebe letho ka eona. E—e ne e se monna ea koetlisitsoeng ho loana. Abrahama e ne e se seloani, e ne e le sehoai. 'Me Abrahama a ke ke a etsa letho, hoba e—e ne e se lesole. Banna ba hae e se masole, e le lihoai. Ka hona a ka etsa ho le hong feela e leng ho phamola tsepiso ea Molimo, ho tsetleha tumelo ea hae le ho tsoa a tloha, ho e sala morao. Hoba Abrahama a bone seo, 'me a tsoare tshepiso eo, a fumana hobane Molimo o mo nètefalelitse eona, hore O hlile o boloka tsepiso ea Oona... Amen! Ke eo.

<sup>71</sup> Haeba u eso amohele Moea o Halalelang le joale, u sa tsebe letho ka Oona, 'me ntho e ka pelöng ea hau e u borella hobane u a O batla, u lule mono hantle. Boo ke Bophelo Bosafeleng, ke seo u leng mojalefa oa sona. Lula mono hantle, 'me u shebe Satane hantle sefahlehong le ho re, "U mokhohotsi, ke uena! Ke tlie ho hapa seo Jesu Kreste a shoetseng ho mpha sona, joale se busetse! Sutha tseleng ea ka!"

<sup>72</sup> Ha ho le joalo, ntho ea pele oa a tseba, Moea o Halalelang o tla tšolohela holima hau. Ke moo ntho e etsahalang. Ntho e tla etsahala. Ke eng? Molimo o ile Oa netefatsa o boloka Lentsoe la Oona. Ke eona hantle feela. Ka hona, le a bona, hoba u bone Lentsoe le netefalatsoa uena, hore u bolokehile, u hlile u na le Moea o Halalelang, joale eng? Abrahama o ne a hapile tholo, ke enoa a khutla a hoanta; o ne a theoha, tumelo ea hae e theiloe holima Lentsoe hore o ne a ka busetsa, seo a lahlehetsoeng ke sona, 'me ke enoa a khutla ka sona, a hoanta mohoanto oa mohloli. Le uena u ka etsa hona hoo. Ha u se na Bophelo Bosafeleng, kopa Molimo. Ipolele libe tsa hau, lumela ho Mora Molimo, amohela kolobetso ea Moea o Halalelang, le ho re, "Molimo, ke a E tlela, ke tlie mona ho E amohela." U ntano khutla, ka mohoanto oa mohloli. O E fumane. Amen. Ho phatsima feela, khele, 'mino oa linonyana o fapane, 'me mang le mang... U rata motho e mong le e mong lekhatheng leo. Ke mohla lehloeo la khale, lonya, khang li tlohileng. Ho rata e mong le e mong! Oh, u monyakeng o moholo, ho bina, ho hooletsa,

ho rorisa Molimo. Ha u tsotelle seo mang a se buang ka uena. E itoketse. Ehlide, mohoantong oa mohlol!

<sup>73</sup> Eaba ho tsoa Mang ho mo khahlanyetsa? Ho tsoa Mang ho mo khahlanyetsa? Melkisedeke. Melkisedeke o tsoa ho mo khahlanyetsa hoba Lentsoe la hae le netefatsoe. Melkisedeke ke eena Ea mo fileng Lentsoe. Eaba o beha Lentsoe la hae... tumelo ea hae Lentsoeng, a hlola 'me a khutla, a ntoo tšoara seqoqo. Amen. Joale, le uena o tla e etsa, hape. Oh, Lentsoe la Oona le tla ba lecha ho uena, nako efe ha u amohela kolobetso ea Moea o Halalelang. Oh, banna!

<sup>74</sup> Oh, u re, "Ha ke khone ho bona lintho tsena. Ha ke lumele ho hlabalitlatse. Ha ke lumele ho bua maleme. Ha ke lumele pholiso ea Khalalelo." E u supa u eso hhole le joale. Ke hantle. Empa hang mohla u hlolang, ke mohla u e fumaneng. U e fumane ke hona. E, mongali, ke mohla u ka hooeletsang. Ke...

<sup>75</sup> Le bone seo nkileng ka se nahana ka ho hobela ka Moea, ho bona motho a ema a hobela ka Moea. Joale, ke bone sesomo sa eona, empa ke bone ntho ea mannete, hape. Ka hona, ka fihla ka fumana, ebe hore'ng batho ba ka tlala Moeeng? Be, ha ke eso bone ea tsoang tseleng, ha ke eso bone ea etsisang boitšoaro bo bobe. Ke—ke e bone kamehla e latsoeha 'me e le taolong 'me e le mosa, 'me ebile le baetsalibe ba titimela aletareng ba pholosoa e ntse e etsahala. Be, ka ipotsa hoba ke eng, ka e fumana e le tlholo.

<sup>76</sup> Davida o hobetse pel'a Morena, mohla Areka e busetsoang nqalong ea phomolo ea Eona. Amen. Eitseha Davida a bona Lentsoe, mohlang oo Le betliloe litafoleng tsa lejoe, le busetsoa nqalong ea Lona e loketseng, Davida a nyakalla 'me a hobela ka Moea, ho likoloha le ho likoloha le ho likoloha. Hobaneng? O bone Lentsoe le boetse nqalong ea Lona. Amen.

<sup>77</sup> Seo Lentsoe le se hlokang, hase se tsoang seminaring ea mofuta, motsoako oa mofuta oa thutabomolimo; empa moreri oa mehla ea khale, ea rometsoeng se-Molimo ka mora sefala, ka Lentsoe, ho bona Molimo o Le netefatsa, kholiso.

<sup>78</sup> Eaba Davida o re, "Khanya ho Molimo, ena ke Eona!" 'Me a likoloha le ho likoloha le ho likoloha le ho likoloha. Mosajana oa hae ea ikakasang a lutse holimō mane, e le morali oa khosi, a re, "Khele, o—o—o a ntlotlolla."

<sup>79</sup> 'Me David a re, "Ha u e rate? Sheba sena!" 'Me a tloha a likoloha le ho likoloha hape. E! Oh, banna, a kene nakong e kakang!

<sup>80</sup> Le a tseba, Molimo oa nyarela Leholumōng, ho re, "Davida, u monna ea pelōng ea Ka ka Sebele." Le a bona? Le a bona? Hobaneng? O ne a lahlehetsoe ke boikhantšo bohle, a se a lahlehetsoe ke ba hae bohle. Athe o ne a nyetse morali oa khosi, empa ha e natsoa lekhatheng leo. O itsebile a khomahantsoe le Mong'a Maholimō le lefatše, 'me Lentsoe la Molimo e lena le

khutlela hara bona hape, 'me Davida a thabile hakaale 'me a tlala. A tlala ka matla a bokhoni ba hae.

<sup>81</sup> Miriama, a phamola moropana a lepella ka lebopo, a ntse a hobela mose oane. Hoba a tšelete Leoatle le Lefubelu 'me a bone lira tsa hae li noetse, ke mohla a neng a ka hobela ka Moea. Mohla a boneng lira tsa hae tse mo tubileng, li shoele, a hobela ka Moea. Ke hantle. Joale, le a bona, ka morao! Hoba ntoa e haptjoe, eaba khanya ea Molimo e a theoха.

<sup>82</sup> Joale, re mo fihlela A mo khahlanyelitse. 'Me ka mora hoba tšepiso e netefatsoe, a—a tšoara seqoqo. Melkisedeke a tsoa ho hlohonolofatsa Abrahama, 'me A re, "Ho bokoe Abrahama, 'me ho bokoe Molimo oa Abrahama, Mong'a Maholimō le lefatše."

<sup>83</sup> Oh, banna, ke rata taba eo hakakang, tšepiso ea molumeli! U re, "E amana kae le rōna?" Ho molumeli e mong le e mong! Tšepiso ea molumeli ke Bophelo Bossafeleng. Tšepiso ea molumeli ke Bophelo, thabo, khotsa, mamello, bonolo, tiisetso, litholoana tsa Moea, pholiso ea Khalalelo, ke ngotse tossene ea lintho mona, nka rialo, tsee e leng lefa la hau. Ke ea hau, empa ha u ka ke oa e fumana hofihlela u e loanela. Ke ea hau. Tsohle tse bonoang, ntho e 'ngoe le e 'ngoe e bonoang ea nakoana, ke ea ka. Molimo o mphile eona, hobane ka Kreste O 'neile eona. Le lintho tse sa bonoeng ke tsa ka. Amen. Ke rata seo! Seo u ka se bonang, joaloka pholiso ea Khalalelo, le joalo-joalo, ka mokhoa oo, li molemo, re ananela seo; empa tse sa bonoeng!

<sup>84</sup> Joale, mahlale a ka lekolisisa mona le ho re, "Be, a re boneng, e re ke nke monna enoa. U itse u folile, e re ke mo theole ho ea mo hlahluba. E re ke bone se hlahileng. 'Me u itlaleha o kile oa tšoaroa ke hlahala, monghali?"

"E, hantle *mono*."

<sup>85</sup> "Be, ha nke ke mo fetise patlisisong ea mahlale 'me ke bone haeba e sa likela kahare 'me e sa tloha. U re u kile oa ba sefotu 'me joale u a bona. Ke tseba joang? E re ke e shebe ho latela mahlale a saense 'me ke e bone."

<sup>86</sup> Joale, mono ba ka batlisisa, empa koana ke—ke mojalefa oa seo, hape, sohle se tšoarehang. 'Me hape ke mojalefa oa lintho tse sa bonoeng, moo mahlale a saense a sitoang ho batlisisa teng. Amen. Amen. Lintho tse sa bonoeng, amen, ke mojalefa oa seo. E, monghali. Lintho tse ka bonoang, ke mojalefa oa eona. Lōna lefatše lena, ke mojalefa, u mojalefa. Molumeli e mong le e mong ke mojalefa, ke mojalefa oa eona. Ho lokile, hape le lintho tse sa bonoeng! Mong'a eng? Maholimō le lefatše. Amen. Lintho tsohle! Na le lumela seo?

<sup>87</sup> U re, "Moena Branham, u ka reng mabapi le kantle mane kanthebo ha u bone? U tseba joang?" E sa ntse e le ea ka. Ke hantle. Leholimō ke la ka. Ke thabile hobane ke la ka, Molimo o boletse joalo. 'Me ke hantle. "Be, ha u eso bone letho, u tseba joang hoba le teng mono?" Ke a tseba le teng, le hona, Molimo o

boletse joalo. “U tseba joang hoba u mojalefa oa lona, athe ha u eso le bone?” Ke lumela Lentsoe la Oona. Amen. Le a bona? Ke mojalefa, u mojalefa le ‘na ‘moho, bohle re majalefa ‘moho ka Kreste Jesu.

<sup>88</sup> Na le hlokometse mona ho Bakorinthe mona, ho Bakorinthe ba Bobeli, Pauluse o boletse, esita le oa lefu, re ruile lefu. E naheneng. Ho rua lefu? E, monghali, le nahana ka rōna. Amen. Be, khanya! Ke se ke lebetse ka sethunya seo se phatlohileng joale, le a bona. Hobaneng a sa mpolaea? Hobane o be a ka sitoa. Ke lona lebaka. Molimo o ne o eso loke. A ka tla khafetsa a e batlang, empa a ke ke a u nka. Amen. Khanya! Ke lefetse molato oa ka khale koana mohla ke lumetseng Jesu Kreste Ea phelang kamehla eohle. Joale lefu le mamela seo re se buang. Amen.

U re, “Morui oa lefu?”

<sup>89</sup> Pauluse o se boletse mona ho Bakorinthe. Lefu, ekasita, re le ruile. Hobaneng, mohla ba tla mo poma hlooho, o itse, “Oh, lefu, tsenene ea hau e kae? Tsenene ea hau e kae? Mpontše u ka ntšosa kae.”

<sup>90</sup> Lefu la re, “Ke tla u katela fatše ke u sunye fatše lebitleng, u tla bola u pute.”

<sup>91</sup> A re, “Empa, oh, ho lebohuoe Molimo,” [Sekheo lebanteng—Mohl.] “U re fang tlholo ka Morena oa rōna Jesu Kreste.” E, monghali. Lefu, lihele, le lebitla, ke li ruile tsohle, hobane O re hloletse tsona tsohle. Mong’ a tsona!

<sup>92</sup> Joaloka Joshua le Kalebe ha ba tlie ka bopaki ba lefatše le sa bonoeng le neng le baletsoe batho ka tsepiso. Joshua le Kalebe ba khutlide le bopaki bo reng le lefatše le joalo le ne le teng. Joale, tlase mona ba ne ba tsoere tsepiso ea lona. Molimo o ba file tsepiso, ‘me ba nyolohela pel’ a lefatše hantle, ba mpa ba eso le bone, ‘me Joshua le Kalebe ba tselala lefatšeng la tsepiso ‘me ba khutla le bopaki ba lefatše le leng teng ‘me e le tulo e ntle, e kollang lebese le linotši. Amen! E ne e le eng? Ba ne ba tla rua lefatše leo. Ba ne ba tsoere tsepiso. Ba ne ba kene leetong la bona le eang teng, ‘me ba se atametse Jordane, ‘me Joshua a tselala khutla le bopaki bo reng e ne e le lefatše le letle.

<sup>93</sup> Hantle seo Joshua a se etselitseng bana ba Israele (*Joshua* e bolela “Mopholosi,” lentsoe Joshua), ‘me le Jesu o etselitse Kereke hona hoo, mohla ba neng ba Mo bolaea. O hlotse lefu. O hlotse lihele. O hlotse lebitla. ‘Me O tsohile hape ka bopaki, kolobetso ea Moea o Halalelang, hore Lefatše le teng mose ho noka, ba re le monate kamehla. Amen. O khutlide a re tlisetsa bopaki. Ebe O etsang, Moena Branham? O khaotsa leshano la hau, ho utsoa, ho noa, ho rohakana, maitšoaro a litšila, ntho e ‘ngoe le e ‘ngoe. O u fetola ‘mopuoa e mocha. Rōna re na beng re shoele sebeng le litlolong, koana ke a phela, hase ‘na empa Kreste o phela ka ho ‘na. Ke ‘mopuoa e mocha ka ho Kreste Jesu, amen, mojalefa oa tsepiso. Alleluia! E, monghali. Lefatše leo ke

la rōna. Ebe u e tseba joang? Joshua o tsohile bafung, o khutlile le bopaki, Moea o Halalelang. Ke O fumane. Amen. Shuu! Khanya! Ke mojalefa. Oh, ngoana oa Khosi, ngoana oa Khosi, mojalefa oa lintho tsohle! Bibebe e boletse joalo. Ona Molimo—ona Molimo o fileng Iseraele tsepiso ea lefatše leo la tsepiso (ho bona e le ntho e sa bonoeng), eona Bibebe eo, ona Molimo o re fileng tsepiso ea Bophelo Bosafeleng, 'me Moea o Halalelang o a e pakela. Kreste o a phela, ha a shoa. O phela hara rōna hantle, ho phela ka ho rōna, ka rōna, ho sebetsa mathokong a rōna. Amen.

<sup>94</sup> E ne e le Oona o lutseng setulong seo tlase mono letsatsi le leng mohla Satane a boneng monyeta ho mpolaea, empa a ke ke a khona. Amen. 'Me a ke ke a e khona hofihlela Kreste a re e lokile. Amen. Ho sa tsotelehe khafetsa a tlang ka eona, o tla khutla a itlhophere matsoho hofihlela Kreste a ntša taelo. Amen. Tsepiso, Molimo o e tsepisitse. Ke Lentsoe la Molimo le e tsepisang, 'me re e lumela kahobane re le majalefa.

<sup>95</sup> Ke mojalefa oa pholiso ea Khalalelo. Ke mojalefa oa thabo, ke na le tokelo ea ho thaba. "Ka hona ebe u thabisoa ke'ng?" Ke na le tokelo eo. "U tseba joang?" Hobane ke mojalefa oa eona. Amen! Shuu! Joale ke ikutloa ke tletse borapeli. E. Ke mojalefa oa thabo. Ke mojalefa oa nyakallo. Ke mojalefa oa khotsa. Ke mojalefa oa Bophelo Bosafeleng. Ke mojalefa oa Moea o Halalelang. Amen. Ke mojalefa oa bopaki ka bong boo O bo tšoereng. Amen. Ke mojalefa oa borena ba Molimo. Amen. "Ke mang ea u entseng seo?" Hase 'na; O e entse. E mong le e mong oa lōna ke mojalefa oa hona hoo.

<sup>96</sup> Mojalefa oa terone! "Ea hlolang o tla lula le 'Na Teroneng ea Ka, joalokaha le 'Na ke hlotse 'me Ke lutse Teroneng ea Ntate oa Ka." Amen, mojalefa oa lintho tsohle! E seng ntho e le 'ngoe feela; lintho tsohle! Ntho e 'ngoe le e 'ngoe e tlaza maoto a hau. Esita le lefu le tlaza maoto a hau, lebitla le tlaza maoto a hau, lihele li tlaza maoto a hau, sebe se tlaza maoto a hau, sohle se tlaza maoto a hau. U mojalefa! U a . . . U shoele, 'me bophelo ba hau bo patuoe ho Molimo ka Jesu Kreste, 'me u tsoselitsoe hape Bophelong Bosafeleng, le ho lula libakeng tsa Maholimo ka ho Kreste Jesu. Oh, banna! Shuu! Le ka re bitsa seo le se batlang, ho re bitsa seo le se batlang, ho re re a hlanya ha le batla, empa re majalefa. Majalefa a eng? Lintho tsohle.

<sup>97</sup> "Na u mojalefa oa Branham Tabernacle?" Che, ke mojalefa oa lintho tsohle. Tse bonoang, tsa joale, tse tlang ho tla, oa sohle, ke mojalefa oa eona.

<sup>98</sup> 'Me sebe ka seng le bokhopo bo behiloe tlaza maoto a ka, ka mohau oa Jesu Kreste. O tsohile Paseka hoseng, ho hlola lefu, lihele le lebitla, le ho nketsa mojalefa, le ho re, "Ema koana 'me Ke tla u neha tsepiso" 'Me mohlanka oa Hae ea boholong ea tlotsitsoeng o itse, "Pallo ena e etselitsoe lōna le bana ba lōna, le ba leng hole kaofela, ba sa tlang ho bitsoa ke Morena Molimo oa

rōna.” Ke mojalefa. Amen. Amen. Jesu o re paketse eona, mohla tsoho ea Hae. Oh, banna.

<sup>99</sup> Mohla re seng re kene mabaleng ao a ntoa lipakeng tsa lefufu bophelo! “Ke moetsalibe, Moena Branham.” Ha u a tlameha. U moetsalibe hobane u lakatsa joalo. Ha u a tlameha ho ba eena. Molato o se o lefiloe.

<sup>100</sup> “Moena Branham, ekare nka ba le thabo.” U ka e fumana. U mpa u lumella Satane ho u khothotsa menyetla eo Kreste a e shoetseng. Ke mojalefa oa eona. Ke ea ka eohle. Ntho e ’ngoe le e ’ngoe eo A e shoetseng, ke ea ka, ke ea hau. Re bana ba Hae, re majalefa a eona, ntho e ’ngoe le e ’ngoe A e shoetseng.

<sup>101</sup> Joale, ha u kena lebaleng leo la ntoa. “Ah, ha ho ntho e kang kolobetso ea Moea o Halalelang. U a tseba, u tla—u a—u tla itsoara ka mokhoa o hlollang. ’Me ntho e tla ba teng, u tla fetoha ntho e itseng e fapapeng.” Ha ke tsotelle kamoo e fapaneng, ke mojalefa oa eona. Boo ke Bophelo, ’me ke Bo sala morao. Ke hantle.

<sup>102</sup> E ka khona e be morero oa moetsalibe ka mong oo. “Ke tlide ho Bo amohela holima motheo oa Moea o Halalelang o leng teng mona joale ’me o mpolella ho tla le ho Bo amohela. Ke ba ka. Nke ke ka tsoha hofihlela ke Bo amohetse. Nke ke ka ba lehlanya. Ke tla lula hantle mona, ha ke tsotelle ntho efe e tlohang. Nke ke ka khaotsa ho rapela hofihlela U mphile Moea o Halalelang, Morena, ’me ke a tseba U tla e phethisa hona joale. Ha ntho e le phoso bophelong ba ka, mpolelle ke tla e etsa. Ke eng, Morena, ke tla ea e lokisa.”

<sup>103</sup> Ha Molimo o sa senole ntho efe, e re, “Ka hona, Satane, ke tlela Oona. U ke ke oa hlola u ema mono hape, sutha tseleng!”

<sup>104</sup> Ke moo, mojalefa oa lintho tsohle. Mojalefa oa Bophelo Bosafeleng. Mojalefa oa pholiso ea Khalalelo. Oh!

Mojalefa oa poloko, moreko oa Molimo,  
Ho tsoaloa ke Moea oa Hae, ho hlatsua Maling  
a Hae.

Ke pale ea ka, ke sefela sa ka,  
Ho rorisa ’Moloki oa me letsatsi lohle.

Boikokobetso bo phethehileng, tsohle li  
phomotse,  
'Na le 'Moloki oa ka ka thabo le ka  
hlohonolofatso;  
Ke shebile holimo, ka tebello 'me ke eme,  
Ke tletse molemo oa Hae le lerato.

Alleluia! Ke moo. Ke pale ea ka, ’me ke sefela sa ka. Ke mojalefa oa poloko. Poloko ke’ng? Ntho eo u e neiloeng. Ke mpho. Ke mojalefa oa poloko. Ea mofuta mong? Oa Bophelo Bosafeleng. Poloko ea moea oa ka, poloko ea ’mele oa ka, poloko ea mokhathala oa ka, poloko ea ntho ka ’ngoe. Molimo o nkentse

ka Kreste mojalefa oa ntho ka 'ngoe, 'me O shoele, ho tsoha, le ho khutla hape le ho tlisa bopaki, le ho O tšela holima rōna. Oh, banna! Khanya! Oh, banna!

<sup>105</sup> Joale, u nyolohela holimo mono, u etsang? Ha u nyoloha joaloka Abrahama, nyolohela mono ka tsepiso eo. "Molimo, U mpoleletse hobane ke ea ka. Ke na le tumelo tsepisong ea Hau. Ke tla ka Lentsoe la Hau. U tsepisitse sena. U itse, 'Kopang, 'me le tla fuoa. Batlang, le tla fumana. Kopang, le tla fuoa. Kokotang, le tla buleloa.' Ke 'na enoa, Morena. Ke mona. Ke a kokota, ke a batla, ke a kopa. Ke tlameha ho E amohela." Ke moo. Ntho e a etsahala ke hona, oh, ha u beha Lentsoe leo fatše.

<sup>106</sup> Sheba seo Satane a se entseng mohla Jesu a neng a mo behela Lentsoe. "'Me Ho boetse ho ngoliloe . . ." O qhometse hole le Thapo eo, joalokaha ke buile bosiu bo bong. E, monghali. E ntano ba eng, ka mora tlholo? U hlola joang? Na u ka e phethisa ka bouena? Che. U eteletsoe pele ke motho mme a u hlolela. Ke Kreste. Ke mpa ke le mojalefa oa eona. Ha ke a tlameha ho etsa ntho efe. Ke mojalefa oa tsepiso. Ntho e le 'ngoe eo ke tlamehang ho ba le eona, ke ho phomotsa tumelo ea ka tsepisong ea Hae. Na le a e bona?

<sup>107</sup> "Moena Branham, na u na le tokelo eo?" Che. "Na u hopola ke na le tokelo?" Che. "Na u hopola Bishopo a na le tokelo?" Che. "O teng motho ea nang le tokelo?" Che. "Be, hobaneng?" U mojalefa.

<sup>108</sup> Holane u le letahoan le fetisisang lefatšeng, 'me ntatao a u sietse milione oa didolara, hore u na le tokelo kapa che, mojalefa oa hae—oa hae—mojalefa, u mojalefa oa letlotlo la ntatao. Sohle seo a u sietseng sona, ke sa hau e bang u na le tokelo kapa che. O u sietse eona. Amen.

<sup>109</sup> Ke ne ke le moetsalibe, empa ke mojalefa. Ke ne ke sa loka, le joale che, empa ke mojalefa. Ke tlameha ho shoa le ho ea liheleng, empa ke mojalefa. Ke mojalefa oa eng? Bophelo Bosafeleng. "U tseba joang hobane u tla Bo fumana?" Ke Bo utloile. Moea o Halalelang o Bo tlisitse. Jesu o tsohile bafung e le hore Bo fihle. 'Me joale Bo tlide, 'me Bo a paka le ho netefatsa hantle feela seo Bo boletseng Bo tla se etsa. Ke tlohile lefung ho kena Bophelong. Ke fetohile, 'mopuoa e mocha ho Kreste Jesu. Ka hona ke mojalefa. E, monghali. Joale ke a hoanta. Amen. Lintho li a hlabakaoa. Lintho tsohle tseo ke li entseng li bolelang? Joaloka Meriama ha a entse. Shebang morao mane, ke tseo, li shoele, li patuoe leootleng la tebalo, Bukeng e kholo ea Buka ea Molimo Leholumōng. E se e phethiloe. Lebitso la ka le se le behiloe Bukeng eo, le tiisitsoe, le ho lahleloa leootleng la tebalo, ho na le Buka e ncha, 'me lebitso le lecha le ngotsoe Khanyeng. 'Me ke la ka. Yaa. Joale re majalefa a lintho tsohle, ke hona.

<sup>110</sup> Hape joaloka mohla Abrahama, ebe Molimo o 'moleletse eng? "Lefatše lena ke la hau. Se leng ho lona ke sa hau. Talima

bochabela, leboea, bophirima, le boroa, ke sa hau sohle, ntho ka 'ngoe mona. Ke batla u tl'o jaka naheng esele, 'me Ke tla u etsa mojalefa oa lefatše leo. Ke tla u neha sena, uena le peō ea hau, e tlang ka morao kamehla." Joale, Abrahama, a tlameha ho etsa ho le hong e leng ho beha tumelo ea hae holima tsepiso eo, ho thonaka sabole ea hae le ho tloha. Nako ea pitlahano ha e fihla, a theohela mono 'me Molimo oa loana ntoa ea hae. 'Me eitseha a loana ntoa, a hlabaka likhosí.

<sup>111</sup> 'Me ke enoa a khutla, amen, ho felile joale. Moena, o ne a ka hooeletsa. Ho utloa bahlankana bohle ba hooeletsa 'me ba roris Morena! Abrahama ke enoa a e tla, 'me ho tsoile Mang ho mo khahlanyetsa? Melkisedeke, Khosi ea Saleme. 'Me le shebe seo ba se entseng. Hoba ntoa e fete, ba ka lula fatše ba ja bohobe le veine. Khosi a tsoa ka bohobe le veine. Hobaneng A mo etselitse eona? Hoba ntoa e fete, ka mora tlholo, ke mohla ba ka lulang fatše ba ja selallo 'moho, ho qoqa le ho ja selallo 'moho. Oh, Molimo o batla bana ba Oona ba etse seo bosius bona.

<sup>112</sup> "U reng ka uena, Moena Branham? U reng ka Kereke eo u buang le eona?" Rona re peō ea Abrahama, bao ke Peō ea Borena ea Abrahama. Rōna re peō ea Abrahama, ka pallo, ka Kreste Jesu re fetoha peō ea Abrahama le majalefa 'moho le eena ka pallo. Efela ha Abrahama e ne e le mojalefa, le 'na ke mojalefa. Ke mojalefa le Abrahama 'moho, le lōna. Athe e tlie joang? Ka Peō ea Borena ea Abrahama, e beng e le Kreste Jesu, Ea tsepisitsoeng, ka tumelo. Abrahama o ne a fuoe mora, ea joaloka ea tsoang bafung. 'Me re amohetse Mora athe e ne e se le mora, ho se mokhoa oa fihla mona, Molimo o Mo ebopile oa Mo romella rōna. 'Me O tlie a re lefella moputso oa libe tsa rōna, 'me ka lefu la Hae ke behoa mojalefa. Oh, banna. Ke lōna bao. 'Me bokhopo bohle ba diabolosi bo setse ka morao. Ho bokoe Molimo!

<sup>113</sup> Ho hlola! Ho hlotse ba bakae, bosius bona? Ha re boneng ka letsoho la lōna, "Ke hlotse ka mohau oa Molimo." Ho bokoe Molimo. Le tseba seo ke hopolang re ka etsa hona joale hantle? Mona ke sa tsoa qala 'me nka le tsoarella bosiu bohle. Ha re tsoareng tšebeletso e monate ea boinehelo, ho khethela Molimo maphelo a rōna bocha. Ba ba bakae ba ikutloang ho etsa hoo? Oh, joale ke ts'oere ho fetang bonngoe, ke phahamisitse matsoho a mabeli, le pelō ea ka, hape. Ke batla hore bophelo ba ka bo buelle Kreste. Ke batla ho ikhethela Kreste bocha. Ke batla ho etsoe thato ea Hae, ea ka e suthisetsoe morao, 'me—'me ho etsoe thato ea Hae. Ke batla mohoanto oa mohloli. E seng hobane e le 'na; hobane ke tseba Evangelie eo A e bolelang kajeno e hloreha ka baka la litšomo tse entsoeng ke malumeli a motho le ntho ka 'ngoe esele. Tlholohali eo re tlamehang ho e hapa sera se e chechiselitsoe morao. Molimo, nke ke tsomule Sabole ena, E phatsime 'me e benye, 'me ke thakhohele pele. Thato ea ka e sale morao, 'me Lentsoe la Oona le qatsohèle kapele joalo, Sabole e bohale e leolitsoeng ka nqa tse peli e hlekang tsela.

<sup>114</sup> Ha re emeng ka maoto a rōna joale re inehela bocha. E mong le e mong ka mokhoa oa hae, inehela ho Morena. Ha re phahamisetseng matsoho a rōna ho Molimo joale, e mong le e mong.

<sup>115</sup> Ntata rōna ea Maholimong, re inehela ho Uena bosiung bona ka bokhabane ba bokhoni ba rōna. Re itseba re le majalefa a lintho tsohle. U e tsepisitse, Morena Jesu, 'me re a e lumela. Joale, re ke ke ra e khona haese ha Uena, Morena...haese ha re bea tumelo ea rōna tsepisong ea Hau. Joale, U boletse, Bibeleng, "Ea jang Nama ea Ka a noa Mali a Ka o na le Bophelo ba kamehla, 'me a ke ke a tla kahlolong, empa o tla tloha...o tlohile lefung ho kena Bophelong. Ea jang Nama ea Ka a noa Mali a Ka o na le Bophelo Bosafeleng, 'me 'Na ke tla mo tsosa ka letsatsi la qetelo." Ke tsepiso eo. Ke seo U se boletseng. Ke seo re se lumelang.

<sup>116</sup> 'Me, Morena Molimo, oho Moea o Halalelang, haola holim'a rōna. Oh, haola, Molimo! Haola, oho Morena, ka ho rōna. Moea oa Molimo o phelang, re amohele, Morena. Ka Lebitso la Kreste re amohele. Ntlhatsoe, mpope, nketse, oho Molimo, ka setšoantšo sa Mora oa Molimo. Ntšoare, Morena, ke oa Hau. Ke U nehela kereke ena. Ke U nehela moea o mong le o mong mona, le oa ka, Morena. Joale re bope re ahe, re ke re lebale mekhoa ea rōna ea sebe le ea bokhopo, le ho tseba ha re mpa re beha tumelo ea rōna—ea rōna, tumelo efe eo re e ruileng, Lentsoeng la Hau la tsepiso, U tla re tlosa tlholong e nnoge ho ea tlholong. U e tsepisitse.

<sup>117</sup> Satane a ke ke a re ntša kotsi, Morena. A ka etsa sohle seo a se khonang, 'me a ke ke a re ama. U kile oa mo sasaletsa holim'a Jobo, Ua re, "Se nke bophelo ba hae." O entse sohle feela a sitoa ho bo nka. Empa o sitiloe, hobane tsepiso ea Hau e ne e sa ntse e etselitsoe Jobo.

<sup>118</sup> 'Me, Molimo, U sa le oona Molimo oo kajeno. U sireletsa ba Hau ka Sebele. Re e tseba e le 'Nete, 'me re inehela bocha. Hlatsoa meea rōna e tletseng sebe, Morena, re sa ipolela tumelo ea rōna. 'Me, Kreste Jesu, re amohele. E tle re ha re qala re ja Selallo sena sa Morena, Molimo, buisana le rōna lipelōng tsa rōna. Re bolelle moo re sitiloeng. Re bontše moo re sitiloeng, Morena. Re e bakela ka boikokobetso. Ka boikokobetso ke beha libe tsohle tsa ka aletareng, Morena. Ka boikokobetso ke ipeha holim'a Lentsoe la Hau, Morena, le mohaung oa Hau.

<sup>119</sup> Ke 'na enoa, Morena, nketse ka ts'oanelo ea Hau. Ke sello sa kereke ena, Morena, "Re sebetse ka ts'oanelo ea Hau." Nka buella 'na—'na feela, Morena, empa ke lumela le bona ba lumela hona hoo pelōng ea bona. Re etse ka tšoaneleho ea Hau. Re a lumela. Re batla ho ba majalefa, 'me re itseba re le majalefa ha feela re ituletsen ka ho Kreste Jesu. Re majalefa 'moho le Eena pel'a Terone.

<sup>120</sup> Joale e ba le rōna. Folisa bakuli hara rōna, Morena. Haeba 'mele o kulang o le teng mona bosiung bona, o ame, o folise,

o phelise. Aba sena, Morena. Moea o kulang ha o le teng, o foliose hona joale. A moea oo o qhoalileng o otollooe. Mangole ao a tetemang a neng a leketlile le matsoho ao a tseremang a phahamisoe ka khanya le mehoo ho Molimo. Litsela tse matsoelintsoeke li otollooe. Ho ahoe 'milakholo oa Molimo oa rona lehoatateng.

<sup>121</sup> Morena, re a lumela U tla kapele, 'me re lumelle ho phatlola Lentsoe la Hau, Morena, le ho aha 'milakholo lehoatateng, libaka tse makukuno li latsoe, bakeng sa Morena oa rōna. Ha re fotholeng motso ka mong oa mokha oa bolumeli. Re fothole motso ka mong oa bokhopo, ho phatlola lonya lohle, mohono le khang, hore Lentsoe la 'nete la Molimo le phalle joaloka linoka tsa thabo. Aba sena, Ntate. Re inehela Uena joale pejana feela re ja Selallo sena sa Morena. Ka Lebitso la Jesu Kreste. Amen.

<sup>122</sup> Nakong eo, Khaitsei Spencer a batlang ho rapelloa 'mele oa hae! [Khaitsei Spencer o buisana le Moena Branham—Mohl.] Molimo a u hlohonolofatse, Khaitsei Spencer.

Ntate ea Maholimong, leqheku lena la mosali oa mohalaleli, le malulo ana. U bona mosali ea qhoalileng. "Na le enoa morali oa Abrahama ha a tšoanelia ho lokolloa ka letsatsi la Sabatha?" 'Me joale e ka ba metsoalle ea hae e mengata, Morena, metsoalle ea khale esale a tloaetse ho e thabisa, bareri bao, ha ba ntse ba lutse tlung ea hae, e se e iketse, ba bangata ba bona, ba se ba nkile 'milakholo o moholo o eang Leholidong. O setse a le mong, Morena, e le bopaki. Ha ho le a mong joale, haese eena le bana ba hae, le motsoalle mona le mane, Morena, oa leloko joale hang ka nako. Empa o eme a inotši joaloka moru o moholo o gefotsoeng ke sefefo, 'me ho setse sefate se le seng. Molimo, ke U rapela ho sheba fatše ka mohau, Morena, hore a tle a tebise metso botebong. Le ho ema leralleng la Kalvari, Morena, ho tseteloa le ho ankoroa Tumelong ea Kreste. Ke beha motsofe enoa oa mosali matsoho le ho khalema lefito lena tlasa leleme la hae, le tlohe 'me a phelisoe. Ka Lebitso la Jesu Kreste. Amen. Molimo a u hlohonolofatse. Ke a u leboha, Khaitsei Spencer. E tla phethisoa. U se ke oa belaela le hang. Ke hantle.

Tumelo ea ka e lelala ho Uena,  
Uena Konyana ea Kalvari,  
Moloki ea Khethhehileng;  
Nkutloe joale ha ke rapela,  
Tlosa libe tsohle tsa ka,  
Ke se ke ka lelera  
Ka sutha pel'a Hao.

Mamelang, binang le 'na joale.

Ha ke tsamaya tseleng e chehiloeng lifi,  
Le mapalesapelo a nama ho ntika,

Uena eba Mosupatsela oa ka;  
 Laela lefifi e be letšeħare,  
 Phumula likeledi tsa masoabi,  
 O ho tloha kajeno  
 Ke be oa Hau ka botlalo!

<sup>123</sup> Ho tsoa botebong ba pelō ea hau joale, Molimo tseba o inotši, ho tsoa botebong ba pelō ea hau, na u hlile u tiile ka seo, “Ho tloha kajeno, Morena, ke be oa Hau ka botlalo”? Ha re bineng kotoana seo sa ho qtetela hape.

Ke se ke ka lelera  
 Ka sutha pel’ a Hao.

<sup>124</sup> Joale bohle ’moho. Molisa e Moholo oa mohlape, U re rutile ho rapela ka mokhoa ona. [Moena Branham le phutheho ba rapela ’moho—Mohl.] Ntata rōna Ea Maholimōng, Lebitso la Hau le Khethehe. Ho tle ’Muso oa Hau. Thato ea Hau e etsoe lefatšeng, joalokaha e etsoa Leholidōng. U re fe kajeno bohobe ba rōna ba letsatsi le leng le leng. Me u re tšoarele melato ea rōna, joaloka ha re tšoarela ba nang le molato ho rōna. Me u se ke ua re isa molekong, u mpe u re loele bobeng; hobane Mmuso ke oa Hau, le matla, le khanya, ka mehla. Amen. Le ka lula fatshe.

<sup>125</sup> Ke koptjoa ho rapella ngoana oa Khaitseli Shepherd. Ke sa tsoa hopola hore ba letsitse nakoana e fetileng ho rapella ngoana, ’me ke nyehetse ho le rapella. Ke ne ke kenetse puisano ea ho kopanela hantle mona, ’me ha ke a khona ho pota tlung. Empa ba tlalehile ngoanana a kula ’me a tšoeroe ke feberu, ’me o batla a satalla, ntle le pelaelo ke vaerase e likolohang hohle. Le tseba ka eona. Ka linako tse ling mesifa ea bona e honyela hoo u tlamehang ho e hlakisetra morao le pele ka matsoho a bona, joaloka Mof. Haley le ba bangata tlase mona. Ke vaerase e likolohang. ’Me eena... ho nyehela thapelo. ’Me ke itse ha lesea le sa ntla fale ka hora ea robong kapa ka nako ha re koala tšebeletso, ho letsetsa koano ’me re tla feta le moo; haeba lesea le hlaphohetsoe, ho itoketse. Rōna joale ka boikokobetso, pele re ja selallo, re rapelle ngoana eo.

<sup>126</sup> Morena Jesu, leseanyana leo, ha ke tsebe lilemo tsa sona kapa le letho, empa ke e mong oa barutuo ba rōna mona ba ratehang, Morena, e mong oa balumeli ba rona. Ke ngoana oa bona, oa Khaitseli Shepherd le Moena Shepherd, lehakoenyana leo U ba fileng lona, Morena. Ke U rapela ho le ela hloko, le ho le hlohonolofatsa le ho le sireletsra, le ho le folisa le ho le phekola. Hona joale re le tsekile. Ka morao ho molaetsa ona, re tseka seo. Re le tsekela khanya ea Molimo, ho latela Lentsoe la Oona. ka Lebitso la Jesu Kreste, maloetse a lese ngoana eo. ’Me ngoana a hlaphoheloe ’me a phele, bakeng sa khanya ea Molimo. Joale e builoe, joale e tla etsoa. Amen. Na le a lumela?

Ha re tšepa re sa belaеle, ruri O tla re ntša;  
 Isa moroalo oa hau ho Morena u o siee teng.

E siee teng, oh, e siee teng,  
 Isa moroalo oa hau ho Morena u e siee teng;  
 Ha u tšepa 'me u sa belaele, ruri O tla re ntša;  
 Isa moroalo oa hau ho Morena u e siee teng. (Ke  
 phetho seo u se etsang.)

Ha mahlaba a katlide 'mele bophelo bo sa  
 khutle,  
 Hopola Molimo Leholimong o arabela thapelo;  
 Joale, Jesu o tseba mahlaba a hau, A ka pholosa  
 'me A folisa;  
 Isa moroalo oa hau ho Morena o u siee.

<sup>127</sup> Joale ha re tsukutlaneng ka matsoho re sa bina seratsoana  
 sena sa ho getela.

U siee teng, (botšoalle, le a tseba, selallo) u siee  
 teng, (ho bokoe Morena!)  
 Isa moroalo ho Morena u o siee teng;  
 Ha re tšepa 'me re sa belaele, ruri O tla u ntša;  
 Isa moroalo oa hao ho Morena u siee teng.

<sup>128</sup> Oh, na ha A babatsehe? Joale, 'moho le maipolelo a rōna, tumelo ea rōna, maipolelo a rōna a libe tsa rōna, ho lumela libe tsa rōna li le leoatleng la tebalo. Ea bolelang libe tsa hae, Molimo o tla ba leballa tsona. Le a bona? Tsona li—li leoatleng la Mali a Jesu Kreste, li se hhole li hopoloa le ka mohla. Ke basali ba ba kae ba tsebang seo bolichi bo leng sona? Lōna bohle. Joale, ha re nkeng bathehali e tletseng Clorox, ke bolichi bo le bong, bathehali e tleteng Clorox. 'Me ha u ka tšoara serothetsa leihlo, 'me u tšetse lerotholi la enke e ntšo kahara serothetsa leihlo seo, tseo ke libe tsa hau. Ho ema hantle holim'a bathe, ho e rothetsa, u ntano sheba ka batheng ho e fumana. Ho etsahetseng ka eona? Ho etsahetseng ka enke? Ha e rothetsoa boliching boo, bo ne bo le matla hakaale hoo bo fetotseng 'mala oa eona ka botlalo, ha e sa tholoa. Ke eng? E nyametse, e lahlehile ka bosafeleng. Ke eng? E—e enke boeona e fetoha Clorox. Ao ke Mali a Jesu Kreste khahlano le sebe se seng le se seng se boletsoeng. Ke eng? Se lebetsoe, se felile, se nyametse, lebaletsoe, se hlaliloe, se lahlue. Ha se sa tla hopoloa khahlano le uena le ka mohla.

<sup>129</sup> [Khaitseli o bua ho tsoa phuthehong—Mohl.] Motho o bitsa lebitso la ka, nqa e 'ngoe. [Khaitseli o paka a re o sa tsoa folisoa.] Be, ho bokoe Morena! O sa ntse a phela! Ho lebohuoe Morena. Re leboha Morena. Oho Molimo, re U leboha hakakang ka molemo oa Hau. E, moea o ikokobelitseng morao mane o anngoe, Morena o mo amile. Ho lokile. Ke Moprista e Moholo ea ka angoang ke maikutlo a mahlomola a rōna.

<sup>130</sup> Hopolang, Lentsoe le leng le le leng ke Ankora, e setletseng le e thata. Ha ho... Le a bona? Behang tumelo ea lōna hantle holim'a eona 'me le se sisinyehe, lula mono feela. Joale, u ke ke oa e beha tlase mono oa e phamola u re, "Ke tla leka hape." E behe

mono. Lula mono hantle le eona. E, monghali. Joaloka Abele ha a entse, shoa ka nqa mehopolo ea hau. E re feela, "Molimo, ke Lentsoe la Hau, hase seo ke se nahanang. Ke Lentsoe la Hau. Ke moo." 'Me Abele o shoetse holima Lefika. 'Me, seo, O tla ama joalokaha A entse khaitseli mono. E bonolo hakaalo feela.

<sup>131</sup> Re leka ho e etsa...Ha re khone. Satane o leka ho e finahanya hakaale, le a tseba, ho re, "Oh, le a tseba, e ne e etselitsoe letsatsi le fetileng," le seo sohle. Ke bomosalumele feela.

<sup>132</sup> Empa ho lōna ba lumelang, O theko e thata. Joale ha e lumelloe, ruri; empa Ke Lejoe le theko e thata le fetohang Lejoe le phelang, Lejoe le theko e thata, Lejoesehlooho la sekhutlo. Oh, banna. Oh, e mong le e mong ea amang Lejoe lena o a folisoa! Ke phetho. Amen.

<sup>133</sup> Joale, ana ha re lebohele Morena? Ke thabo feela, ke thabile haholo ha Morena e le Molimo. Amen. Ka thabo ha E le Ntate ea mofuthu, ea tletseng mohau, ea hlomphang Lentsoe la Hae, ea bolokang Selekan sa Hae, ho sa Se lebale le ka mohla. O boloka Selekan sa Hae. O tlamehile joalo, Ke Molimo, O Se entse. Ke Seliba sa 'Nete eohle. Le a bona? Ho ke ke ha sala letho haese 'Nete e sa silafatsoang ka linako tsohle. Lentsoe le leng le le leng leo A le bolelang ha le tlaile. 'Me lena ke Lentsoe la Hae. 'Me, oho Molimo, tumelo ea ka e se ke ea tlaila ho Lona, amen, ke mohla E sa tlo tlaila joalokaha Lentsoe le sa tlaile, 'me Lentsoe ha le lutse tumelong ea mofuta oo le tla hlahisa sohle seo Lentsoe le bolelang Le tla se etsa. Amen. Ka hona, ntlhatsoe, Morena. Nteke, ntlhoekise, mpholise, ntshireletse, ntlhohonolofatse, le ho mpha mehauhelo ea Hau, ke thapelo ea ka ho Molimo. Amen.

<sup>134</sup> Joale, ke tlil'o bala Lentsoe le itseng joale, le fumanoa ho Bakorinthe ba Pele, khaolo ea 11, temana ea 23.

*Hobane nna ke amohetse ho Morena seo hape ke  
le neileng sona, Ke hoba Morena Jesu ka bosiu...a  
ekiloeng ka bona o ne a nke bohobe:*

*'Me hobane A ise lebohe, a bo ngoatha, le ho re, Nkang,  
'me le je: hona ke mmele wa ka, o robewang lona: le etse  
hoo le tle le nkhopole ka hona.*

*Ka mokhoa o joalo a nkile... a nka senoelo, 'me hoba  
a lalle, a re, Senoelo ke sena sa selekan se secha maling  
a ka: sena se be ho lōna, kamehla ha lea noela ho sona,  
le tle le nkhopole ka hona.*

*Efela ka mehla eohle ha lea ja bohobe bona, 'me  
le noela senoelong seo, etlaba lea bolela teng lefu la  
Morena a tle a be a fihla.*

*Ka baka leo mang le mang ea jang bohobe boo,  
kapa ea noelang senoelong sa Morena, ka mokhoa o sa*

*tšoanelang, o tla ba molato maling, oa 'mele le oa mali a Morena.*

*Motho ka mong a ke a itekole ke hona, 'me joale e be hona a jang sa bohobe bona, a noelang ho senoelong sena.*

*Hobane ea jang le ea noang ka mokhoa o sa tšoanelang, o itjella o inoella tsuo, hobane a sa lemohe 'mele oa Morena.*

*Ke ka baka le ba kulang le ba fokolang hara lōna, . . . bangata ba se ba bile ba shoele.*

*Hobane hoja re ka iwahlola, ke moo re ka beng re sa ahloloe.*

*Empa ha re ahlolwa, re lauwa ke Morena, re tle re se ke ra tsuoa le lefats'e.*

*Ha ho le joalo, banabesō, ha le phuthehela ho ja, le ke le letane le e mong, le ke le letane.*

<sup>135</sup> Joale na nka bua sena. Jesu o re neile molao ona pele A ea lefung la Hae, O tsebile a tla ea teng. Barutuo ba ntse ba ipotsa seo A se bolelang, mohla ba ngolang taba ena. Empa O itse, “Senoelo sena ke Testamente e Ncha ea Mali a Ka. Kamehla ha le ejia le noa, le bontša lefu la Ka hofihlela Ke fihla.” Oh, Mantsoe a thekothata ao!

<sup>136</sup> Ntle le pelaelo barutuo ba ipotsitse, “Ebe O bolelang, ‘ho bontša lefu la Hae’? Hona re ka ho etsa joang?” Hona hohle e le sephiri ho bona, empa e seng ho Eena. E ne e le Molimo. O tsebile seo A tšoanelang ho se etsa. “Ho bontša . . .” Ka hona O itse, “Ha le phutheha ho ja . . .”

<sup>137</sup> Joale, “Ea jang le ea noang, ka mokhoa o sa tšoanelang,” ea nyolohelang mona ‘me a ipitsa Mokreste, a ja ‘mele oa Morena, a tsoa a phela le lefatše ‘me—‘me a latola Kreste le matla a Hae, le lintho tse kang tseo, u—u hlile u tlottlolla Molimo. U—u tlottlolla Kreste, u se ke oa se ja ke hona. Empa ha u leka ka bokhoni bohole bo ahileng ho uena, ho phela hantle le ho itšupa Mokreste, hore u rata Jesu Kreste, ke tšoanelo ea hau ho e etsa.

<sup>138</sup> ‘Me joale koana ho . . . Ke lumela ke Santa Johanne, khaolo ea 6, Jesu o itse, “Ea jang Nama ea Ka ‘me a noa Mali a Ka o na le Bophelo ba kamehla, ‘me Ke tla mo tsosa letsatsing la bofelo.” Joale, tsepiso eo, na ha se ntho e tlottlehileng eo? “Ke tla mo tsosa.”

<sup>139</sup> Na le kile la nahana sepheo sa rōna mona? E be le—e be le ea sekolong ka sepheo sefe, bana? E u sebeletsang, ntate? Le tsosoa ke’ng, le ‘mè, hoseng, le ho isa bathoana bao sekolong, ho ba photla, le ho ala libethe le ho pheha, le—le—le ho etsa sohle? Ho kena, le khathetse bosiu boo, ‘me letsatsi le latelang le qala ntho eona eo. Ebe le e etsetsang? Hobaneng le ikhathatsa le sotleha le ka bokhoba, ntate, le ntho ka ‘ngoe? Ho kena bosiu, le imetsoe,

'me ha ngoana e mong a kula u ea holimō le tlase fulurung, u lla u rapela u loana, 'me ba fola; le ho khutlela morao, 'me u boela o u e etsa. 'Me Sontaha se seng le se seng u hlatsoa lifahleho tsa bona, le ho ba theolela kerekeng. 'Me, be, hona hohle ho bolelang? Mona le batlang? Na ke ho fela ha eona? Khele, e ka ba bomalimabe, athe u tseba u tšoanela ho ea leha ho le joalo. Le a bona? Hona hohle ho bolelang?

<sup>140</sup> Oh! Moena, ke nako ea hlahlobo, ke nako ea monyetla! Ke monyetla oa ho amohela Sena. Mpolelleng se ka tlatsang sebaka sa Eona. Mpolelleng ntho e fetang Eo ka molemo. Hlahisa ntho efe lefatšeng, ho ba khosi ea lefatše, ho rena holim'a bokahohle, ho ba Khrushchev kapa Kennedy, kapa seo u ka lakatsang ho ba sona, u tla shoa ka ho tšoana. Hantle! Ha u tsebe mohla le tla fihla, motsotso ofe. Empa mona, le ha lefu le otla, u ruile Bophelo Bosafeleng 'me u ke ke oa shoa, ka tiisetso ea Molimo oa popo eohle, E leng Mong'a Maholimo le lefatše, "Ke tla mo tsosa ka letsatsi la qetelo."

<sup>141</sup> Thusa ho se lumele ha ka, oho Uena Molimo. Tlatsa moea oa ka, oho Molimo, ntlhatsoe, ntlatse, mpoloke, nthomele kantle. Se ntumelle ho shoa, ke phelele ho phetha Pale. Nke ke finyelle lepatso ka leng le khutlo ea lefatše, le ho bolela Lentsoe le ho jala peō, e, monghali, ho tle ho finyelloe kotulo letsatsing la qetelo, ea Lentsoe la 'nete le sa tlaileng, la balumeli ho Kreste.

<sup>142</sup> Na libe tsa hau li tlasa Mali, ka tumelo bosiung bona ho Kreste Jesu? Joale re tla ja selallo. Hase selallo; u lalla ha u eja le e mong. Lalla le Molimo feela. Selallo ha se bohobe, ha se veine, *selallo* ke "ho buisana le Molimo morao le pele." 'Me ena ke papiso eo re e jang, e reng re lumela lefung la Hae, 'meleng o robiloeng, kepelong ea Hae le tsohong, re lumela Boteng ba Moea o Halalelang. 'Me re lumela hobane O re neile Bophelo Bosafeleng 'me re ke ke ra shoa, re tlohile lefung ho kena Bophelong. 'Me ka letsatsi le leng mohla re arohanang mona, re tla hlahisa hape tsohong le e mong le e mong 'moho, ho kopana Kreste Jesu 'moho, joaloka 'Mele. Amen. Holima motheo ona, le maipolelong a libe tsa ka, le tumelong ea ka ho Mora Molimo, ke hlahisa 'na le kereke ka pel'a likotoana tsena tseo Molimo o re sietseng tsona ho li phethisa, ho bontša lefu la Hae A tle a be a fihle.

<sup>143</sup> Jesu o itse, "Ona ke 'mele oa Ka o robeloang lōna. E jang, le etse hona le Nkhopole ka hona."

<sup>144</sup> Ntata rōna ea Maholimong, ka mora ho ipolela libe tsa rōna, ho utloa Lentsoe la Hau, ka mora ho ipolela re se na tokelo, 'me re itsepisitse feela ka menyetla ea Mora oa Molimo. Re lhloliloeng tse se nang tokelo. Re tšoarele, Morena, tsohle tseo re li entseng. 'Me joale, ka tumelo, re atamela tafole ea Morena. 'Me joale e re bohobe bona bo sa nyeheloa ho lekanya 'mele oa Morena oa rōna, ke a rapela, Ntate, U tle u bo halaletse morero oa bona. 'Me

mang le mang ea nkang kabelo mona a be le Bophelo Bosafeleng moeeng oa bona. 'Me motho e mong le e mong ea bo jang a folilsoe 'meleng oa bona, le ho phela nako e baliloeng eo U ba baletseng eona. 'Me ba U sebeletse matsatsi ohle a ho phela ha bona, le ho tsosoa letsatsing la qetelo tsohong, ho teanngoa hammoho le merabe ea lefatše e lopolotsoeng ka Mali a Kreste. Aba sena, Morena, ka Lebitso la Jesu re a e kopa. Amen.

<sup>145</sup> Bibele e itse, "Ka mokhoa o joalo A nka senoelo, 'me hoba A lalle, a re, 'Senoelo sena ke sa Testamente e Ncha, kamehla ha le noa le bontša lefu la Morena A tle a be a fihle."

<sup>146</sup> Ntate ea Maholimong, re U hlahisetsa tholoana ea morara bosiung bona, veine ena. 'Me re a rapela, Ntate ea Maholimong, U halaletse veine ena, e lekanya Mali a tšolohetseng rōna Kalvari. Ka Mali ana re na le tšoarelo ea libe tsa rōna, ka tumelo mosebetsing o phethiloeng oa Jesu Kreste. Re tšoarele tsa rōna . . . ho se lumele hohle ha rōna, Morena, le ho re fa tumelo le kutloisiso, le ho re etsa bahlanka ba Hau, Morena, re tle re U sebeletse matsatsi ohle a rōna. E ba le rōna, Ntate, re sa teana re teetse tafole ena hare, le ho re hlolaholofatsa seqoqong sena se hlabosehang le selallong le Uena. 'Me U bue le lipelō tsa rōna ho re supisa mosebetsi o re tlamang ho o phethisa. Aba sena, Morena. Halaletsa veine ena morerong oa eona. Ka Lebitso la Jesu Kreste re a e kopa. Amen.



*HO RUA LINTHO TSOHLE SST62-0506*  
(Possessing All Things)

Molaetsa wona, ka Moena William Marrion Branham, o rerilwe sethatong ka Senyesemane Sontaha mantsiboya, Motsheanong 6, 1962, mane Branham Tabernakele, Jeffersonville, Indiana, U.S.A., o ntshitswe kgatisong ya teipi ya makenete mme o ngotswe o sa kgaolwa ka Senyesemane. Petolelo ena ya Sesotho sa Borwa e ngotswe mme e abjwa ke ba Voice Of God Recordings.

SOUTH SOTHO

©2021 VGR, ALL RIGHTS RESERVED

VOICE OF GOD RECORDINGS, SOUTH AFRICA OFFICE  
58 DISA ROAD, ADMIRAL'S PARK, GORDON'S BAY 7140 WESTERN CAPE  
REPUBLIC OF SOUTH AFRICA

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Temoso Ea Tokelo Ea Qopitso

Litokelo tsohle li babaletsoe. Buka ena e ka porintoa ka porintara ea lelapa molemong oa motho eo kapa ea abjoa, ntle ho tefiso, e le thepa e jalang Evangeli ea Jesu Kreste. Buka ena e ke ke ea rekisoa, ea boela ea hilahisoa ka bongata, ea manehoa leboteng la website, ea bolokoa ka tsela eo e ka boelang ea ntšoa, ea fetoleloa ka lipuo lisele, kapa ea sebelisoa ho qela matlole ntle le tumello e ngotsoeng ea Voice Of God Recordings®.

Ho fuoa boitsebiso bo bong kapa bakeng sa thepa e nngoe e ka fumanoang, ka kopo ikopanye le:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)